

Tti Vicononxinhí Juan

Tti joinchenohe Jesucristo Juan

¹ Jihi tti Dios joinchenohe Jesucristo, para que Jesucristo joinchenohe cain chojni que tenchehe xé cain tti chonda que siconhe otoin. Co Jesucristo rroanha ná ángel de jehe para joinchenohe Juan, xinchehe xé jehe, cain jihi. ² Co janha Juan na ndaçhjan nao cainxin tti vicononxinna, co janha tti ndaçhjan ixin joajné Dios que Jesucristo joinch-esegurá, joajna mé jáñ ndoa joajna.

³ Anto čhjoin para ixin tti chojni que tsjehe xón jihi; co anto čhjoin para ixin cain tti chojni que ttinhi joajna jihi que joixin de ngain Dios, co ncuhehe na caso cain tti jitaxin ngain xón jihi, ixin ochiaon joí tiempo are cainxin tti jitaxin nttihi siconhe.

Juan rroanha joajna ngain yáto nihngo

⁴ Janha Juan rricjin na joajna jihi para nganji ra xo ditticaon ra Jesucristo ngain nonttehe Asia. Dayehe ra tti jian co tti čhjoin que tonohe ansean ra, ixin cayoi mé ttixin de ngain Dios, tti ttjen jai, tti vehe are saho, co tti tsí iná; co cai de tti yáto espíritu que te ntiha ngaca lugar tti ttjen Dios dayehe ra cayoi joajna jihi; ⁵ co cayoi joajna jihi cai ttixin de ngain Jesucristo, tti testigoe Dios que nichja nao, co jehe tti saho xechon, co jai jehe tti chonda joachaxin para ngain cain xí que ttetonha ngataha nontte jihi. Co jehe Cristo anto rinao na jáñ na co ojonttaroa na conixin jní que

jehe cointtji para ixin cain cosa jianha que ján na jointtoho na. ⁶ Co jehe ochjá na joachaxin de tsetonha na conixin jehe co de sontte na dané Dios, Ndodé jehe. ¡Jehe Jesucristo jiquininxin tosayehe co cainxin joachaxin para cainxin tiempo! Amén.

⁷ ¡Tsjexin ra, Cristo tsí ngacjan ttjoi! Cainxin chojni sicon na mé hasta cai tti cjoaya ngain jehe Cristo. Co chojni de cain rajna de ngoixin mundo rrotsjanga na are sicon na mé. Ján, jañá siconhe.

⁸ Cristo, tti chonda cain joachaxin, tti jí jai, tti vehe desde are saho, co tti tsí iná, mé jehe ndačho: “Janha tti icha saho varichon de cainxin cosa co janha sarihi are cainxin cosa ndatsjexin, jañá inchin tti letra A saho de cain letra co inchin Z tti último de cain letra.”

Are Cristo xago ngain Juan

⁹ Janha Juan, ná hermano de jaha ra de ngain Cristo, co janha rridetan tangui cai inchin jaha ra; co janha chonda parte ngain tti ttetonha Dios inchin jaha ra; co janha cai tonona čhjoin de ixin tti paciencia que Cristo chjá na. Janha vi-axinna ngain isla que dini Patmos ixin ndattjan chojni joajné Dios que Jesucristo joinchesegurá. ¹⁰ Co ná nchanho domingo joí joachaxín Espíritu Santo nganji na janha, co coian anto sén noton na inchin ná tté chojni, que mé inchin are toyao ná trompeta. ¹¹ Co chojni mé ndachjenji na:

—Janha tti icha saho varichon de cainxin cosa, co janha sarihi are cainxin cosa ndatsjexin, jañá inchin tti letra A saho de cain letra co inchin Z tti último de cain letra. Jaha cjin ngain ná libro tti rridicon jaxon, co rroanha cain mé ngain tti chojni que ditticaon na na janha ngain tti yáto nihngo

que te ngain regioen Asia; jihu rročho tti ngain nihngo Efeso, Esmirna, Pérgamo, Tiatira, Sardis, Filadelfia, co ngain Laodicea.

¹² Janha ngaria tsjá para vicon quensen jinichjahna. Co are janha jointtaha mé, janha vicon yáto candelero de oro. ¹³ Co ngayé tti yáto candelero mé janha vicon ná tti inchin xenhe ná xí. Co jehe jingá ná lontto jini que jicaxin hasta ngataha nontte, co jittedonga ná cinturón de oro ngain pechoe. ¹⁴ Co xajá anto roa xá, inchin chjon roa, o sea inchin čhingga ngataha jnanchaha. Co jmacon xá xohi teche. ¹⁵ Rotté conguixima inchin chia que dinki bronce que xottexin ngain xohi, co digoan chia pulido. Co tté anto soji inchin ruido que nczechjian jinda de tsje río. ¹⁶ Ngá rá lado jian jichonda yáto conotse, co de ngain rroha vačhjixin ná espada anto yao que chonda filo de yoixin lado. Co ngá con jitonguixin inchin nchanho are anto soa.

¹⁷ Are janha vicon mé, joaritsinga ngacarotté xá ndavenhe na. Pero jehe coín rá lado jian ngataha na, co ndachjenji na:

—Xaonha jaha, ixin janha tti icha saho varichon de cainxin cosa, co janha tti sarihi are cainxin cosa ndatsjixin. ¹⁸ Janha tti rrichon jai. Masqui venhe na, pero jai rrichon para cainxin tiempo. Janha chonda joachaxin ngain tti ndadenhe ni co ngain lugar tti ttji cain chojni que ndadenhe. ¹⁹ Mexinxin cjin tti jaha vicon, tti jitonhe jai co tti siconhe después. ²⁰ Janhi rročho tti yáto conotse que jaha vicon ngain rana lado jian na, co tti yáto candelero de oro: tti yáto conotse rročho tti dicao

joajna ngain tti yáto nihngo. Co tti yáto candelero rročho tti yáto nihngo.

2

Nttihi tsexinxin joajna para tti yáto nihngo: Joajna para ngain nihngo Efeso

¹ Cjin joajna jiji ngain jehe tti dicao joajné Dios ngain nihngo que jí ngain ciudad de Efeso: “Janhi ndačho jehe tti chonda tti yáto conotse ngá rá jian co tti rridehe ngayé tti yáto candelero de oro: ² Janha nona cain tti jaha ra ncchehe ra co janha chonxin ixin anto soji ncchehe ra xá ra, co ixin chonda ra paciencia, co ixin dittoaxinha ra que sintte chojni jianha ngayaha ra. Co janha nona ixin vaquehe ra prueba tti chojni que ndačho ixin jehe na representantena na janha, pero ndoaha, co jaha ra vatsoan ra ixin jehe na ncheyaxon na. ³ Anto chonda ra paciencia, vetan ra tangui co anto joinchehe ra xá para ixin janha, co masqui jamé, xonhi tiempo goan ra desanimado. ⁴ Pero janha chonda ná cosa nchaooha que tenchehe ra jaha ra: que ixin irinaoha ni ra jai inchin are nacoexinxon ra vitticaon ni ra. ⁵ Mexinxin xaxaon ra quexén vintte ra are nacoexinxon ra vitticaon ni ra co ttentoxinhi ra vidá ra co ncchehe ra inchin vanchehe ra are mé. Si nahi, janha toin saso nganji ra co sinttjianxin ningoa ra de tti jí ningoa, pero si tsentoxinhi ra vidá ra isinttjianha ningoa. ⁶ Pero masqui jamé, anto nchao ixin jaha ra ningaconhe ra tti ncchehe chojni nicolaítas, ixin janha cai ningacoan tti ncchehe chojni mé. ⁷ Jaha ra que ttinxin ra jian, ttinhi ra tti ndačho Espíritu Santo ngain nihngo tehe: Tti chojni que tsixinhi de

sincheha cosa jianha, janha rrochjaha joachaxin para sine na tti ttochjoin de ngain nttattochjoin que danjo vida, que nttá mé jí ntta ngain huerté Dios.”

Joajna para ngain nihngo Esmirna

⁸ 'Co cjin joajna jiji ngain jehe tti dicao joajné Dios ngain nihngo que jí ngain ciudad de Esmirna: “Janhi ndačho jehe tti icha saho vehe de cainxin cosa, tti sehe are cainxin cosa ndatsjexin, co jehe tti ndavenhe co cjan jichon jai: ⁹ Janha nona cain tti ncuhehe ra, co chonxin cain tti tangui que teden- tan ra co nona ixin anto noa ra de ngain cosa de ngataha nontte jiji, pero masqui jamé, anto rico ra de ngain Dios. Co janha nona ixin chojni judío que ditticaonha nganji na janha, chojni mé nichja jianha de ixin jaha ra, pero chojni mé chojní Sa- tanás. ¹⁰ Jaha ra ḥaonha ra de cain cosa tangui que sattohe ra, ixin inchínji tsiaxinho canxion de jaha ra ngain cárcel para que cainxin ra satto ra prueba. Co chonda que tangui tsonha ra inchin tté nchanho. Pero jaha ra ncuhehe ra sigue ditticaon ra Dios hasta que ndasenhe ra co janha rrochjaha ra iná vida naroaxin inchin ná premio para ixin jaha ra. ¹¹ Jaha ra que ttinxin ra jian, ttinhi ra tti ndačho Espíritu Santo ngain nihngo tehe: Tti chojni que tsixinhi de sincheha cosa jianha, ḥonhi tsonhe chojni mé are icha chojni ndasenhe yoxin nttiha.”

Joajna para ngain nihngo Pérgamo

¹² 'Co cjin joajna jiji ngain jehe tti dicao joajné Dios ngain nihngo que jí ngain ciudad de Pérgamo: “Janhi ndačho jehe tti jichonda espada

anto yao que chonda filo de yoixin lado: ¹³ Janha nona cain tti tenchehe ra co nona que ixin jaha ra te ra ngain lugar tti ttetonha Satanás. Pero masqui jamé, jaha ra cain tiempo jian ditticaon ni ra. Co hasta cointtoeha ra de vitticaon ni ra ni ngain tti tiempo que Antipas, tti testigona que vitticaon na janha cainxin tiempo, nagoenxon na ngayaha ra nttiha ngain lugar tti jí Satanás. ¹⁴ Pero janha chonda canxion cosa nchaoha que tenchehe ra jaha ra: que ixin nttiha ngain ciudad de Pérgamo chonda ra canxion chojni que nchehe na inchin joinchehe Balaam, tti joinchecoenhe Balac quexén para joinchejiana chojni Israel ngattoxon con Dios ixin joine na cosa que tosayexin ídolo co ixin vancheyehe na iná nché que jeha nchihihi na. ¹⁵ Co cai nchaoha ixin nttiha ngayaha ra te canxion chojni que nchehe inchin chojni nicolaítas, co tti nchehe na, mé tti janha ningacoan. ¹⁶ Mexinxin ttentoxinhi ra tti tenchehe ra, ixin si nahi, janha saso daca nganji ra co tsetoquinha chojni mé conixin tti espada que jidaçhjexin de rroha na janha. ¹⁷ Jaha ra que ttinxin ra jian, ttinki ra tti ndaçho Espíritu Santo ngain nihngo tehe: Tti chojni que tsixinhi de sincheha cosa jianha, janha rrochjaha chojni mé joachaxin para sine tti maná que jima jai. Co rrochjaha chojni mé ná xo roa, co nganito xo mé setaxin ná nombre naroaxin para ixin chojni mé que xonhi chojni chonxin nombre mé sino que jeho tti chojni que sayé xo mé.”

Joajna para ngain nihngo Tiatira

18 'Co cjin joajna jiji ngain jehe tti dicao joajné Dios ngain nihngo que jí ngain ciudad de Tiatira: "Janhi ndaäho jehe tti Xenhe Dios, tti jiche inchin xohi ngain jmacon, corotté inchin chia que dinhi bronce que digoan pulido: **19** Janha nona cain tti ncchehe ra co chonxin ixin anto rinao ni ra janha, co ixin anto ditticaon ni ra janha, co ixin anto tenchehe ra xá para ixin janha, co ixin chonda ra paciencia. Co janha nona que jai jaha ra icha tsje tenchehe ra que are nacoexinxon ra vitticaon ni ra. **20** Pero janha chonda ná cosa nchaoha que tenchehe ra jaha ra: que ixin dittoaxin ra que dehe ngayaha ra ná nchí que ncchehe nchá inchin vanchehe nchí que vinhi Jezabel. Janhi ncchehe nchí jiji; ndaäho nchá ixin nichja nchá joajna que dayé nchá de ngain Dios, pero jehe nchá jeho ncchehe nchá chojni que ncchehe xana janha para que jehe na tsontaonxin na iná nchí que jeha nchichihi na co jine na cosa que tosayexin ídolo. **21** Janha ochjaha nchá tiempo para que jehe nchá tsentoxinhi nchá tti jinchehe nchá, pero jehe nchá xá choha nchá. Co xá ttinttoeha nchá de danjo nchá cuerpo nchá ngain tsje xí. **22** Co jai janha sinttaha que jehe nchá tsonihi nchá co setsingataha nchá nontte, co cai cainxin chojni que ncchehe inchin jehe nchá setan na tangui si jehe na tsinttoeha na de tti tenchehe na. **23** Co janha nasoenxon cain chojni que ocoangui na ditticaon na cain tti ndaäho nchá. Jamé cainxin chojni ngain cainxin nihngo tsonohe na ixin janha chonxin hasta tti ngain joarrixaoen cada chojni co ngain ansén na. Co janha rrochjaha ra cada ra inchin tti jaha ra joinchehe ra. **24** Pero icha

ra que te ra nttiha ngain ciudad de Tiatira, jaha ra xo nccheha ra tti ncchehe nchí mé, ni xonhi tiempo joatsoan ra tti jehe na ncheguinhi na tti secreto anto jima de Satanás, janha rrindattjo ra que irrochjaha ra iná cosa tangui hasta que jeho tti ochonda ra. ²⁵ Pero ttencjhinha ra tti jian que jaha ra ochonda ra jai hasta que janha sihi iná. ²⁶ Cain tti chojni que tsixinhi de sincheha cosa jianha co tti nisinchehe sigue sinchehe na inchin janha rinaho hasta que tsjexin mundo, janha rrochjaha cain chojni mé joachaxin de tsetonhe na cain nación, ²⁷ jañá inchin Ndodana chjana Ndo joachaxin janha. Co jehe na tsetonhe na cain nación conixin ná nttacotto de chia. Co chojní nación que sitticaonha sicaonxin nttacotto mé hasta rrochjeca cuerpo como si rrocji ná chi. ²⁸ Co cai janha rrochjaha chojni mé tti conotse que nchengasán are ndoyo. ²⁹ Jaha ra que ttinxin ra jian, ttinhi ra tti ndačho Espíritu Santo ngain nihngo tehe.”

3

Joajna para ngain nihngo Sardis

¹ 'Co cjin joajna jiji ngain jehe tti dicao joajné Dios ngain nihngo que jí ngain ciudad de Sardis: “Janhi ndačho jehe tti chonda tti yáto espiritué Dios co tti yáto conotse: Janha nona cain tti ncchehe ra co nona ixin jai jaha ra ondadiguenhe ra de ngain espirituá ra masqui chojni ndačho na ixin xa techon ra. ² Mexinxin, xingamaha ra, co chjehe ra fuerza cain cosa que xa jí masqui cosa mé ondajidenhe, ixin janha vicon que tti ncchehe ra xa jeha jian ngattoxon con Dios de janha. ³ Mexinxin

ꝑaxaon ra tti coangui ra, co nchehe ra sigue mé jai, co ttentoxinhi ra tti tenchehe ra jai. Si sincheha ra jamé, janha saso contra nganji ra ꝑá ná tti chehe sin que tsonoaha ra quesa o quehe hora. ⁴ Masqui nchaoaha tenchehe ra canxion ra, pero cai nttiha ngayaha ra ngain ciudad de Sardis te canxion chojni que ꝑonhi quittja dichjé na lonttoe na; mé rročho ꝑonhi cosa jianha rridinchehe na. Co jehe nimé ni sacji nganji na janha conixin lonttoe na roa, ixin jamé tequininxin na. ⁵ Cain tti chojni que tsixinhi de sincheha cosa jianha, chojni mé tti sinttengá lontto roa, co janha tsonxantteha nombré na de ngain ꝑón tti tetaxin cain chojni que chonda iná vida naroaxin. Co janha rrondačhjan ixin chonxin chojni mé ngattoxon con Ndodana co ngattoxon con cain ángel que te nttiha. ⁶ Jaha ra que ttinxin ra jian, ttinhi ra tti ndačho Espíritu Santo ngain nihngo tehe.”

Joajna para ngain nihngo Filadelfia

⁷ 'Co cjin joajna jíhi ngain jehe tti dicao joajné Dios ngain nihngo que jí ngain ciudad de Filadelfia: “Janhi ndačho jehe tti anto jian co tti nichja tti ndoa, co tti chonda joachaxin de rey David que are jehe dantjé ná puerta, ni ná chojni čhoha ttejé puerta, co are jehe ttejé ná puerta ni ná chojni čhoha dantjé puerta. ⁸ Janha nona cain tti nchehe ra. Janha coín nganji ra ná puerta jiꝑangué co ni ná chojni čhoha tsejé puerta, ixin masqui jaha ra chondaha ra tsje fuerza, jaha ra joinchehe ra caso ngain joajnana janha co ꝑonhi tiempo ndache ra icha chojni ixin chonxinha ni ra. ⁹ Mexinxin janha rrrorroanha nganji ra tti

chojni que nchehe inchin rinao Satanás, chojni mé judío na pero ditticaonha na nganji na janha inchin jiquinixin chojni judío de ngain ansén na. Janha rrrorroanha chojni mé nganji ra co tsetoan na que sinttettoxin nttajochjihí na ngaca rottea ra para que tsonohe na que janha jáñ rinaho ra. ¹⁰ Jaha ra chonda ra paciencia inchin janha coetonha ra, co mexinxin janha tsjenguijna ra para que xonhi tsonha ra are tsí tiempo are Dios saquehe prueba ngain cain chojni ngoixin mundo jihí. ¹¹ Janha sihi toin. Jaha ra nchehe ra sigue tti jian que jaha ra tenchehe ra para que xonhi chojni santsjaha ra premioa ra que sayehe ra. ¹² Cain tti chojni que tsixinhi de sincheha cosa jianha, janha rrondačjan que chojni mé sintte na inchin columna que jiquehe ningoe Dios de janha, co jehe nimé xonhi tiempo sačhjexin na de nttiha. Co nganito jehe na janha tsentaxin nombré Dios, co nombré tti ciudé Dios, rročho tti Jerusalén naroaxin que tsixin de ngajni tti ttjen Dios. Co janha tsentaxin nganito jehe na tti nombrena naroaxin. ¹³ Jaha ra que ttinxin ra jian, ttinihi ra tti ndačho Espíritu Santo ngain nihngo tehe.”

Joajna para ngain nihngo Laodicea

¹⁴ 'Co cjin joajna jihí ngain jehe tti dicao joajné Dios ngain nihngo que jí ngain ciudad de Laodicea: “Janhi ndačho jehe tti mero ndoa, tti jian testigoe Dios que nichja ndoa, co tti vehe icha saho de cain tti joinchechjian Dios: ¹⁵ Janha nona cain tti nchehe ra. Co nona ixin jaha ra inchin

jinda que jeha quin ni jeha soa. Mé rročho que rinaoha ra rrocjan ra inchin chojni que ditticaonha nganji na janha ni inchin chojni que jian ditticaon nganji na janha. ¡Icha nchao si ditticaon ni ra o ditticaonha ni ra! ¹⁶ Pero ixin jaha ra jeho inchin jinda yáso co jeha quin ra ni soa ra, janha tsoncjan jaha ra de ngain rroha na janha. ¹⁷ Ixin jaha ra ndačho ra ixin anto rico ra co ixin de cain cosa, anto jian te ra co ḵonhi nchetján ra. Pero jaha ra tonoaha ra que techinhi ra co tangui tonoha ra ngain espiritua ra, cai noa ra, chejo ra co ttolocho ra de ngain espiritua ra. ¹⁸ Mexinxin janha rrindattjo ra que ttehna ra de nganji na janha oro jian que dixotte ngain ḵohi co que ixonhi jinche jiyá oro; jamé para jaha ra ndoa sintte ra rico. Co ttehna ra lontto roa de nganji na janha para sinttengaha ra co rročanotaon tti joasoaxin que chonda ra jai. Co ttehna ra ḵoan de nganji na janha para sinttjingui jmacon ra para que nchao sicon ra. ¹⁹ Janha nttasattá co nttacastigá cain chojni que janha rinaho. Mexinxin chonda ra que ttentoxinhi ra vidá ra hasta que anto sinao ra sinchehe ra tti janha rrittetonha ra. ²⁰ Tsjexinxin ra, janha rrindanguia puerté nchia para rrinichjá chojni. Si čonja chojni tsinhi ttana co santjé na nchiandoha na, janha sixinhi co sinequinha chojni mé, co jehe sine nganji na janha. ²¹ Cain tti chojni que tsixinhi de sincheha cosa jianha, chojni mé ntiha sariquinha tti janha rrihi rrittetonha, inchin janha coixinna co joacha tti rrittetonha čica Ndodana. ²² Jaha ra que ttinxin ra jian, ttinhi ra tti ndačho Espíritu Santo ngain nihngó tehe.”

4*Janhi tocoanxin ngajni tti ttjen Dios*

¹ Después de cain jihi, janha tsjá iná co vicon ná puerta jiñangué ngajni co tti tté Jesucristo que nichjahna icha saho que inchin tté ná trompeta are toyao, mé ndachjenji na janha:

—Tani nttihi co tsjagoha cain cosa que chonda que siconhe después de cain jihi.

² Ngain rato mé joí Espíritu Santo nganji na janha conixin anto tsje joachaxin, co janha vicon ná ntaxintaon importante jí nttiha ngajni, co ngataha ntaxintaon mé tajitaha xá figuré ná tti xí. ³ Co tti jitaha ntaxintaon mé ngá con jehe anto jitonguixin inchin ná xo fino que dinki jaspe o xo que dinki cornalina. Co ngandanji ntaxintaon mé jí ná conchecha que jitonguixin inchin tti xo que dinki esmeralda. ⁴ Co ngandanji ntaxintaon mé janha vicon iveinticuatro ntaxintaon, co nttiha tetaha veinticuatro nittetonha que tengá na lontto roa co techjinga na corona de oro. ⁵ Co de ngain tti ntaxintaon saho que janha vicon, de nttiha tedaçhjexin xoí rayo co icha ruido co jidatte. Co nttiha ngain ntaxintaon mé teche yáto candil de xohi, que mé tti yáto espiritue Dios. ⁶ Co nttiha ngaca ntaxintaon mé jí ná cosa inchin ndachaon que nchao dicondoxin ni inchin xoðao.

Co ngandanji ntaxintaon mé jí ná cosa que jichon. Co cosa mé ngoixin ngama chonda jmacon de ngajinxin co notonxin. ⁷ Tti saho de tti canoi cosa jihi jí inchin ná coleón. Co tti yoxin jí inchin ná coxinttá. Co tti ninxin jichonda con inchin ngá con ná xí. Co tti nonxin jí inchin ná coaguila que

jitjaganga. ⁸ Canoi cosa que techon mé techonda incjaon nenechán cada. Co ngoixin ngama co ngaxinhi techonda jmacon; de ttie co de nchanho joxon tendačho:

Santo, santo, santo,
Dios, soixin que chonda cainxin joachaxin,
soixin tti Dios que varihi desde are saho, co rrihi
jai, co soixin tti sihi iná.

⁹ Co cada nttiha que jehe tti canoi cosa que techon nchesayehe co danjo gracias ngain jehe tti jitaha ntaxintaon icha importante, tti jichon para cainxin tiempo, ¹⁰ cada nttiha mé tti veinticuatro nittetonha dinttettoxin nttajochjihi na ngain jehe tti jichon para cainxin tiempo, co ttín na coroné na nttiha ngaca ntaxintaon mé, co ndačho na:

¹¹ Soixin tti Dios na na janha na, soixin tti jiquininxin
cainxin gloria, co jiquininxin tosayaha co cainxin
joachaxin;
ixin soixin tti joinchechjian cainxin cosa,
co ixin soixin jamé joinao, mé texin co
conchjianxin cainxin cosa.

5

xón co Colecœ Dios

¹ Cottimeja janha vicon ixin jehe tti jitaha ntaxintaon mé jiyá xón ngá rá lado jian. xón mé jixea inchin ná rollo, co jitaxin de ngaxinhi xón mé co de ndojaxin, co jijexin xón conixin yáto sello. ² Co vicon janha ná ángel que chonda tsje joachaxin que jidanchiangui anto sén co jindačho:

—¿Quensen chonda joachaxin de santjé xón jihí co tsinchje cain sello que jiyá xón?

³ Pero ni de nttiha ngajni, ni nttihi ngataha nontte, ni de ngangui nontte coha ná chojni que nchao rrrogantjé xón mé, ni para rrotsjehe na ngain xón. ⁴ Co janha anto tsjanga ixin xa xonhi quensen tsoxiré xón co tsjao xón, ni para rrotsjehe xón. ⁵ Cottimeja ná de tti veinticuatro nittetonha ndachjenji na janha:

—Jaha itsjangaha icha, ixin Coleón que joixin de ngain grupoe Judá de chojni Israel, tti mé cjoí razé rey David, mé ojoacha para que jehe nchao santjé xón jihí co tsinchje tti yáto sello que jiyá xón.

⁶ Cottimeja ngaca tti nttaxintaon icha importante co ngayé jehe tti nó cosa que techon, co ngayé tti veinticuatro nittetonha, janha vicon ná Coleco tajingattjen va nttiha masqui dicon ni ixin digoen na va. Co jichonda va yáto nttehe va co yáto jmacon va. Co tti yáto jmacon va mé rročho tti yáto espíritu que Dios rroanha ngoixin ngataha nontte. ⁷ Jehe Coleco mé cjoí va co coá va xón que jiyá ngá rá lado jian de jehe tti jitaha nttaxintaon icha importante nttiha. ⁸ Are jehe Coleco coá va xón mé, tti canoi cosa que techon co tti veinticuatro nittetonha vinttett toxin nttajochjihí na ngattoxon con Coleco mé. Cada nittetonha mé techonda na naná arpa co teyá na naná vaso de oro tecaon tsjoca, co mé rročho cain tti nchecoanxin cain chojní Dios. ⁹ Co tetsje na ná himno naroaxin que ndačho janhi:

Soixin jiquininxin de sayehe xón yá co tsinchje
cain sello que jiyá xón;
ixin soixin onagoenxon na ngataha nontte, co jnia
cjoengaxin hna

cain tti jianha que nchehe chojni de cain raza,
 chojni de cain nguigoa, chojni de cain rajna,
 co chojni de cain nación.

¹⁰ Soixin ochjana ni ra joachaxin de tsetonha na
 conixin soixin co de sintte na dané Dios de
 ján na.

Co ochjana ni ra joachaxin de tsetonha na ngataha
 nontte.

¹¹ Cottimeja tsjá iná co coian tté de anto tsje ángel
 que tate ngandanji ntaxintaon icha importante
 ntiha co ngandanji tti canio cosa que techon co
 ngandanji tti veinticuatro nittetonha que te nt-
 tiha. Ntiha te anto tsje millones de ángel. ¹² Co
 tendačho sén:

Tti Coleco que nagoenxon na ngataha nontte,
 co mé co jiquininxin sayé va cain joachaxin co
 cain cosa que jí,
 co jehe va jiquininxin sayé va cain tti nohe Dios,
 co cain fuerza,
 co jehe va jiquininxin tsosayehe va co tsocoanx-
 inhi va.

¹³ Co cai cain cosa que Dios joinchechjian que
 te ntiha ngajni co ntihi ngataha nontte, co tti te
 ngangui nontte, co tti te ngain ndachaon, co cain
 cosa que jí coian tendačho janhi:

Tti jitaha ntaxintaon co tti Coleco, cayoi mé
 tequininxin
 tsocoanxini co tsosayehe, co joachaxín jehe sehe
 para cainxin tiempo.

¹⁴ Co tti canoi cosa que techon ntiha tendačho:
 —Ján, jamé tsonhe!

Co tti veinticuatro nittetonha vinttettoxin na
 nttaojchiji na co joinchesayehe na jehe tti jichon
 para cainxin tiempo.

6

Tti yáto sello que jiyá xón

¹ Cottimeja janha vicon que Colecoe Dios coinchje va saho sello que jiyá xón mé, co ngain rato mé coian nichja ná de tti nó cosa que techon ntiha. Tté jehe anto soji inchin are datte, co jehe cosa mé ndačho:

—¡Xacoi co tsjehe!

² Janha tsjá co vicon ná conxin roa. Co tti jitaha va jiyá ná chijno. Co digayé ná corona ixin ojoacha, co sacjoi para joinchehe sigue joigacha icha.

³ Are Colecoe Dios coinchje va tti yoxin sello, janha coian nichja tti yoxin cosa que techon ntiha. Co jehe cosa mé ndačho:

—¡Xacoi co tsjehe!

⁴ Co vačhje ná conxin jatse. Co tti jitaha va vayé joachaxin de saqueha contento ansén chojni ngataha nontte para que jehe na tsexinhi na tseto na co nasoenxon chó na. Co jehe tti jitaha conxin mé vayé ná espada anto jie.

⁵ Are Colecoe Dios coinchje va tti ninxin sello, janha coian nichja tti ninxin cosa que techon ntiha. Co jehe cosa mé ndačho:

—¡Xacoi co tsjehe!

Janha tsjá co vicon ná conxin ttie. Co tti jitaha va jiyá ná balanza ngá rá. ⁶ Co ngayé tti canoi cosa que techon, ntiha janha coian tté Dios que ndačho:

—Jeho nacoa kilo de trigo rentte tti dacha ni ngain ná nchanho. Co jamé rentte ní kilo de cebada cai. Pero nchexincoaha ra aceite ni vino.

7 Are Colecoe Dios coinchje va tti nonxin sello, janha coian nichja tti nonxin cosa que techon nttiha. Co jehe cosa mé ndaächo:

—¡Xacoi co tsjehe!

8 Janha tsjá co vicon ná conixin sine. Co tti jitaha va dinki Muerte. Co noton mé joí tti representanté lugar tti ttji chojni ndadiguenhe. Co cayoi jehe na vayé na joachaxin para nadoenxon na ná cuarta parte de cain chojni ngoixin mundo conixin guerra, jintta, chin, co coxigo čhíntto de ngataha nontte.

9 Are Colecoe Dios coinchje va tti naonxin sello, janha vicon ngangui altar que jí nttiha, cain almé cain chojni que vintteguenhe ixin vandache na icha chojni tti jian joajné Dios co ixin cjoí na jian testigo de joajna mé. **10** Cain almé chojni jihi tendaächo sén:

—Dios, soixin tti jian co cain tiempo ncchehe tti soixin ndaächo, ¿quejanhi tiempo xá tsončhjanha para sinchejuzguehe co sinchecastigá tti chojni que nagoenxon na na janha na que te ngataha nontte?

11 Cottimeja cain almé chojni mé vayé na lontto roa co vitonhe na que xá sinchejogaha na vé nchion, hasta rroxetteja senhe cainxin chojni que chonda que ndasenhe inchin cain tti chojni que te nttiha, ixin jehe na xá tenchehe na xé Jesucristo.

12 Are Colecoe Dios coinchje va tti incjaonxin sello, janha tsjá co vicon que anto soji coingui nontte. Co nchanho ndaconaxin xehe inchin lontto ttie, co conittjao ngoixin va ndacjan va inchin jni. **13** Co conotse que te ngajni vinttji

va para ngataha nontte inchin are ntahigo dingongui ntta ttochjoín ntta are anto soji tja čhíntto.

¹⁴ Co ngajni ndavítján inchin ná xón are xea xón. Co cain jna co cain isla coinguixin de tti te.

¹⁵ Cottimeja cain rey de ngataha nontte, conixin icha chojni importante co chojni rico, co xittenha ngain xisoldado, co icha chojni que chonda joachaxin, co cainxin chojni que te esclavo co cainxin chojni libre; cainxin chojni mé tavinttema na ngaxinhi cueva co ngayé ttjao ngain jna. ¹⁶ Co vinttendačho na ngain jna co ngain ttjao:

—Dinttji ra ngataha na janha na, co ttema ni ra de ngattroxon con tti jitaha ntaxintaon icha importante, co de ngain tti anto soji castigo que sanjo Colecoe Dios.

¹⁷ Ixin ojoí nchanho para castigo icha soji de cainxin castigo, ¿co quensen tsixinhi ngain castigo jih?

7

Chojni Israel que Dios coinchiehe para vayé sel-loe

¹ Después de cain jih, janha vicon nó ángel taten-gattjen ngataha tti nó lado de ngataha nontte tti ttixin čhíntto. Co tatequehe tti nó čhíntto para que xonhi čhíntto tsja ngataha nontte, ni ngataonhe ndachaon, ni ngataon ni ná ntá. ² Cai vicon iná ángel que joixin de tti čhinxin nchanho co jichonda selloe Dios que jichon. Jehe ángel jih coyaotte soji tti nó ángel que vayé joachaxin para sinchenihi ngataha nontte co ngain ndachaon co ndačho:

³ —Ña ncheniha ra nontte ni ndachaon ni cain ntá, hasta que janha na tsjexin tsín na selloe Dios ngain ntattjen cain ninchehe xé Dios de jána.

⁴ Co janha coian ixin cain tti chojni que vayé selloe Dios ngain ntattjen cjoí ciento cuarenta y cuatro mil chojni de ngayé cain tti tteyó grupoe chojni Israel. ⁵ Tteyó mil de tti chojni que vayé selloe cjoí de ngain grupoe Judá, tteyó mil na de ngain grupoe Rubén, tteyó mil na de ngain grupoe Gad, ⁶ tteyó mil na de ngain grupoe Aser, tteyó mil na de ngain grupoe Neftalí, tteyó mil na de ngain grupoe Manasés, ⁷ tteyó mil na de ngain grupoe Simeón, tteyó mil na de ngain grupoe Leví, tteyó mil na de ngain grupoe Isacar, ⁸ tteyó mil na de ngain grupoe Zabulón, tteyó mil na de ngain grupoe José, co itteyó mil na de ngain grupoe Benjamín.

Tti anto tsje chojni que tengá lontto roa

⁹ Después de cain jihi, janha tsjá co vicon anto tsje chojni de cainxin nación, co de cain raza, co de cain nguigoa co de cain rajna que jí ngataha nontte nttihi. Co cain nimé tatengattjen na nttiha ngaca ntaxintaon icha importante, co ngaca Colecoe Dios. Vintte anto tsje chojni mé que hasta ni ná chojni coixinha coequin na, co tengá na joxon lontto roa, co cain na teyá na cajne ngá rá na. ¹⁰ Cain na tetoyao na co tendačho na:

Ján na chonda na iná vida naroaxin de ixin Dios
tti ttjen ngataha ntaxintaon importante
co de ixin Colecoe Dios.

11 Co cainxin ángel de ntiha tatengattjen ntiha ngandanji tti veinticuatro nittetonha, co ngandanji tti nó cosa que techon cai. Co cain ángel mé vinttecjañantaha nontte ngaca nttaxintaon mé co joinchesayehe Dios. **12** Cain ángel mé ndačho:

¡Amén! Para cainxin tiempo Dios de ján na jiquininixin

tsocoanxinho, jiquininxin nohe cainxin, co jiquininxin que chojni sanjo na gracias ngain, co jehe jiquininxin tsosayehe, co jiquininxin cain joachaxin co fuerza. Amén.

13 Cottimeja ná de tti venticuatro nittetonha mé joanchianguina janha co ndačho:

—¿Quensen cain chojni jihí que tengá lontto roa co de ttinó joixin na?

14 Janha ndattjan:

—Soixin noha.

Co jehe ndachjenji na:

—Cain chojni jihí tti ni anto tangui conhe na co jehe cain niyá nijoincheroaxin lonttoe conixin jní tti Colecoe Dios. **15** Mexinxin jai jehe na te na ngandaxinho Dios co nchesayehe na Dios de nchanho co de ttie ngain nchiandoha Dios. Co jehe Dios, tti retaha nttaxintaon yá, senda cain chojni yá. **16** Cain chojni yá isenha na jintta ni jinda, ni irrochjanha na ni tanguiha tsonohe na ngandaohe soa, **17** ixin tti Colecoe Dios que jí ngaca nttaxintaon mé tti senda jehe na, inchin tti ttin-garia coleco dicao cuidado de ixin coe, co jehe sicao va ngain tti jičhinxin jinda que danjo iná vida naroaxin. Co Dios tti sinchexema ndacon cain jehe na.

8

Tti yatoxin sello conixin tti oro que chexin tsjoca

¹ Are Colecoe Dios coinchje va tti yatoxin sello que jiyá xón mé, ntiha ngajni xonhi ruido vehe inchin rioho hora. ² Cottimeja janha vicon tti yáto ángel que tengattjen ntiha ngattoxon con Dios, co cain ángel mé vayé naná trompeta. ³ Cottimeja janha vicon iná ángel conixin ná chi de oro que chexin tsjoca, co joiguengattjen ángel ntiha ngaca altar. Co vayé ángel mé anto tsje tsjoca, para sanjo cain tsjoca mé conixin cain joatotsenhe ñaoe cain chojní Dios ntiha ngataha altar de oro que jí ntiha ngaca ntaxintaoen Dios. ⁴ Nchin de tsjoca mé conixin cain tti joatotsenhe ñaoe chojní Dios cjoinhi de ngá rá ángel mé para ngattoxon con Dios. ⁵ Cottimeja jehe ángel mé coá jehe chia que chexin tsjoca mé, co joinchecaon de xoittja que jí ntiha ngain altar mé co cjoa para ngataha nontte. Cottimeja coexinhi anto joatte, co anto vehe ruido, anto cjoa rayo, co soji coingui nontte.

Tti joiconhe are coyao trompeta

⁶ Cottimeja tti yáto ángel que teyá tti yáto trompeta ovintte listo para sanoa trompeta.

⁷ Tti saho ángel vanoa trompeta, co vania ttoni co xohi que jittecjan jni. Cain mé vinttji para ngataha nontte co che ná tti ninxin parte de ngataha nontte, conixin ná tti ninxin parte de cain nttá, conixin ná tti ninxin parte de cain ca yoa.

⁸ Tti yoxin ángel vanoa trompeté, co joiguetsian-gui ngangui ndachaon ná cosa inchin ná jna jie que jiche conixin xohi. Co ná tti ninxin parte de ndachaon ndacjan nda jni. ⁹ Co ná tti ninxin parte

de cain cosa que techon ngangui nda ndavenhe, co ná tti ninxin parte de cain barco que jí ngain nda ndaxantte.

¹⁰ Tti ninxin ángel vanoa trompeté, co ná conotse anto jie vetsingaxin va de ngajni, co jiche va conixin xohi. Co vetsinga va ngain ná tti ninxin parte de cain río co cain tti techinxin jinda. ¹¹ Co conotse mé vinhí va Tsja co ná tti ninxin parte de cain jinda mé ndacontsja nda. Co anto tsje chojni ndavintteguenhe na ixin vihi na jinda mé, que anto ndacontsja.

¹² Tti nonxin ángel vanoa trompeté, co conihi ná tti ninxin parte de nchanho, co cai ná tti ninxin parte de conittjao, co cai ná tti ninxin parte de conotse. Mexinxin ná tti ninxin parte de cain cosa mé ndaconaxin xehe, co cain mé vanjoha xóí ngoixin ná tti ninxin parte de nchanho ni de ttie.

¹³ Cottimeja janha tsjá co coian jindačho ná ángel que jitjaganga hasta ngosine ngajni co nichja sén, co ndačho:

—¡Anto tangui tsonhe cain chojni que te ngataha nontte are sanoa tti iní ángel trompeté!

9

¹ Are tti naonxin ángel vanoa trompeté, janha vi-
con ná conotse que xincanjinxin va de ngajni para
ngataha nontte. Co conotse mé vayé va llavé tsaga
anto nihnga. ² Cottimeja conotse mé vanttjé va
jehe lugar mé co nttihā cjoinxin ná nchin anto jie
inchin nchin que ttixin de ngain ná horno anto jie.
Co nchin mé ndajoinchenaxin xehe nchanho co
čhintto. ³ Co de ngain nchin mé vačhjexin anto tsje
coxoali que cjoaganga va ngataon nontte. Co cain

coxoali mé vayé va joachaxin inchin joachaxin que chonda conttanchia nttihi ngataha nontte.

⁴ Co vitonhe va que ḥonhi sinchehe va ngain cain ca que te ngataha nontte, ni ná cosa yoa, ni ngain ná nttá yoa, sino que jeho sinchenihi va cain tti chojni que chondaha marca de selloe Dios ngain ntattjen. ⁵ Pero coaha va joachaxin de nasoenxon va chojni mé, sino que jeho sincheguetan va chojni mé tangui cuerpoe ngoixin naho conittjao. Co tti anto tsín na mé inchin ttinxin ná chojni are nehe ná conttanchia. ⁶ Ngain cain nchanho mé chojni sinao na ndasenhe na, pero čoha senhe na. Masqui jehe na anto sinao na ndasenhe na, pero čoha ixin la muerte satsjixin de ngain na.

⁷ Jehe coxoali mé te va inchin conxin que te listo para guerra. Ngataha já va tetaha ná cosa que te inchin ná corona de oro, co ngá con va te inchin ngá con chojni. ⁸ Co ḥajá va inchin ḥajá nčí, co neno va te ḥá neno coleón. ⁹ Co ngoí cuerpoe va tengá ná cosa inchin chia, co ruido que nchechjian nenehe va are tjaganga va inchin ruido que nchechjian tsje carroe conxin are ttinga carro para ngain guerra. ¹⁰ Chonda va nttané va ḥá nttané conttanchia que chonda nchaha. Co nttiha ngain nttané va chondaxin va joachaxin para ncheninxin va chojni ngoixin naho conittjao. ¹¹ Cain coxoali mé chonda va ná tti ttetonha ngain va co jehe mé tti ángel de ngain tti tsaga anto nihnga; co jehe ángel jihí dini de ngain nguigoa hebreo Abadón, co ngain nguigoa griego dini ángel jihí Apolión, co cayoi nombre mé rročho: tti nchexantte cain cosa.

¹² Ojoexin tti saho cosa anto tangui, pero ḥa

ditján iyó cosa tangui.

¹³ Are tti ángel incjaonxin vanoa trompeté, janha coian ná tté ángel que vačhjexin de ngayé tti nó nttehe altar de oro que jí nttiha ngattoxon con Dios. ¹⁴ Co jehe tté ángel mé ndačho ngain jehe tti incjaonxin ángel que jiyá trompeta:

—Tonxindanguehe tti nó ángel que tečhia te ngaca río Eufrates que anto jie.

¹⁵ Jamé xindanguehe jehe tti canoi ángel mé, para nagoenxon ná tti ninxin parte de cain chojni, ixin ángel mé ote listo para sinchehe jamé ngain hora mé, ngain nchanho mé, ngain conittjao mé, co ngain nano mé. ¹⁶ Janha coian quejanhi tsjexin xisoldadoe canoi ángel mé, co de tti xite-taha conxin, yó ciento de millón tsjexin xa.

¹⁷ Co jañá viconxin con janha cain conxin yá. Co xitetaha va, ngain pechoe xa tedicaoxin xa chia de ní color; jatse inchin xohi, co azul inchin ngajni, co sine inchin azufre. Co cain conxin mé techonda já va inchin já coleón, co de ngain rroha va tedačhjexin xohi, co nchin, co azufre. ¹⁸ Tti ninxin parte de cain chojni ndavintteguenhe na de ixin jehe tti ní tipo de castigo que tedačhjexin ngain rroha conxin, co castigo mé: xohi, co nchin, co azufre. ¹⁹ Ixin tti cjoayaxin cain conxin mé techonda va ngain rroha va co ngain nttané va. Nttané va chonda já xá conché, co, conixin nttané va mé goenxin va chojni.

²⁰ Pero tti ittoha chojni que xehe, tti nindav-enha de ixin jehe chin jihi, nimé cointtoeha na de nchehe na cosa jianha que jehe na tenchehe na, ni cointtoeha na de nchesayehe na espíritu jianha,

co cain ídolo de oro, de plata, de bronce, de xo, co de nttá. Co cain ídolo mé čohoa dicon, ni ttinha, ni čhjiha. ²¹ Ni cai cain chojni mé cointtoeha na de nadoenxon na chojni, ni de dantonga na chojni, ni de ncheyeha na iná nchí o iná xí, ni de ttehe na cosé iná chojni.

10

Angel conixin ná librochjan

¹ Cottimeja janha vicon iná ángel que chonda tsje joachaxin que jixincanjinxin de ngajni ngacjan ttjoi conixin ná conchecha ngataha já. Co ngá con ángel mé jitonguixian xá nchanho, co rotté inchin columna de xohi. ² Co ángel mé jiyá ná librochjan que jiřangué. Co coín rotté lado jian ngataonhe ndachaon, co rotté lado cjon coín ngataha nontte. ³ Cottimeja ángel mé coyao sén inchin are soji tojiehe ná coleón. Co are jehe coyao, yáto tti dattehe nichja conixin tté jehe mismo. ⁴ Co después de que yáto tti dattehe mé nichja, janha rroquentaxin cain palabra mé, pero coian tté Dios desde ngajni que ndachjenji na:

—Ttenchjinha cain jihi, co ndačhoha tti ndačho tti yáto dattehe yá, co ttentaxinha palabra yá.

⁵ Cottimeja jehe tti ángel que janha vicon tajingattjen de ngataonhe ndachaon co ngataha nontte, tsín rá lado jian para ngajni, ⁶ co joinchejurá de ixin tti jichon para cainxin tiempo, tti joinchechjian ngajni, nontte, ndachaon co cainxin cosa que jí ngain cain parte yá, co ángel mé ndačho:

—Itsončjenha icha tiempo, ⁷ ixin are tsí tti nchanho que tti yatoxin ángel tsexinhi sanoa

trompeté, are mé otsonhe tti anto jimao que xaxaon Dios desde are saho, inchin jehe ndačho ngain ninchehe xé, rročho ngain cain profeta.

⁸ Tti tté Dios que janha coian joixin de ngajni, cjan nichja nganji na janha iná co ndačho:

—Jaha ttji co ta tti librochjan que jiřangué que jiyá ángel jiha tti jingattjen desde ngataonhe ndachaon co ngataha nontte.

⁹ Cottimeja janha cjoi ngain ángel mé para joiganchiá librochjan mé co jehe ndachjenji na:

—Jenhe, dayehe librochjan co jintte librochjan. De ngain rroha tsonoha anto dulce inchin tsjen, pero de ngaxinhi tsé anto ndatsontsja.

¹⁰ Cottimeja janha coá librochjan mé de ngá rá ángel mé co joine. Co de ngagaha rroha na, janha conona que anto dulce inchin tsjen, pero después que janha joine ndacontsja ngaxinhi na.

¹¹ Cottimeja ndachjenji na na:

—Jaha chonda que rrocjan rrondache chojni iná tti ndačho Dios de ixin tsje rajna, de ixin tsje nación, de ixin tsje nguigoa co de ixin tsje rey.

11

Tti yó testigo

¹ Cottimeja janha vayá ná nttá que jí inchin ná nttá que xattechoaxin, co vitonna:

—Dingattjen co dattechoha nchiandoha Dios conixin altar cai, co ttequin quejanhi chojni nchesayexin Dios nttiha. ² Pero dattechoaha tti patio que jí ndoja de nchiandoha Dios, ixin mé ovayé chojni de icha nación, co nimé ni feo sinchehe ngain tti ciudad santa ngoixin cuarenta y dos

conittjao. ³ Co janha rrrorroanha yó testigona que rronichja ngain chojni de ixin janha ngoixin tti mil dosciento sesenta nchanho mé, co cayoi testigo mé sinttengá lontto ttie inchin lontto dinttengá chojni que ta joachjaon are ndadenhe ná nifamilié.

⁴ Jehe tti yó testigo mé tti yó nttaolivo, co tti yó candelero que te ngattoxon con Dios que tte-tonha ngataha nontte. ⁵ Co si čhonja chojni sinao sinchenihi jehe testigo tehe, jehe de rroha sint-tecjaxin xohi que ndatsjaga cain tti chojni que rroningaconhe. Co jañá chonda que senhe quex-eho chojni que sinao sinchenihi testigo mé. ⁶ Jehe cayoi testigo jihí chonda joachaxin de tsejé ngajni para que irrochjeha čhin ngataha nontte ngoixin tiempo que jehe rronichja de ixin Dios. Co cai chonda joachaxin para que jinda tsongjan nda jni, co para sincheguetan tangui cain chojni ngataha nontte conixin cain tipo de chin cainxin ntiha que jehe sinao. ⁷ Pero are jehe tsjehe xé, tti coxigo jianha tsajinxin va de ngain tti tsaga anto nihnga, co tsetocaho va jehe cayoi testigo mé, co jehe tsixinha ngain va. Jehe va tsjaya va co nasoenxon va jehe cayoi testigo jihí. ⁸ Co cuerpoe sintji cuerpo ngá ntiha de tti ciudad que anto jie, tti cjoixin crucificado Cristo. Co ciudad mé ogoan inchin ciudad de Sodoma co nonttehe Egipto tti vehe joxon cosa jianha. ⁹ Co para ní nchanho co rioho, chojni de cain rajna, chojni de cain raza, chojni de cain nguigoa, co chojni de cain nación sicon na cuerpoe jehe cayoi testigo jihí, co tsančhjandaha na cayoi cuerpo jihí para que rroxavá. ¹⁰ Cain chojni que te ngataha nontte rroché na ixin ndasenhe

cayoi testigo jihí, co anto rroché na que hasta rrrorroenhe chó na regalo ná na co ná na ixin tti cayoi xí mé que vanichja de ixin Dios, ná cosa anto tangui para ixin jehe na. ¹¹ Pero después de tti ní nchanho co rioho mé, Dios joinchexechon cayoi xí mé, co vintteguingattjen xa iná, co cain chojni que vicon mé anto vintteñaon na. ¹² Cottimeja jehe cayoi testigo mé vinttequinhi tté Jesucristo que joixin de ngajni co ndačho anto sén:

—Tani ra nttihi noi.

Cayoi testigo mé savinttecajín para ngajni ngacjan ná ttjoi co cain chojni que ningaconhe vicon na. ¹³ Co ngain rato mé anto soji coingui nontte, co ná tti ttxin parte de ciudad mé ndaxantte co yáto mil chojni ndavintteguenhe na ixin coingui nontte. Co ittoha chojni que xa xehe, joinchecoanxinho na Dios que ttjen ngajni ixin anto vintteñaon na.

¹⁴ Ojoexin tti yoxin cosa anto tangui yá, pero toin tsí tti ninxin.

Tti yatoxin trompeta

¹⁵ Tti yatoxin ángel vanoa trompeté co anto sén coini ni tté de tsje chojni que joixin de ngajni que ndačho:

Tti joachaxin para ttetonha ngataha nontte ojoiguehe para

Dios conixin Cristo;

co jehe Dios tti tsetonha para cainxin tiempo.

¹⁶ Cottimeja tti veinticuatro nittetonha que tate-taha na nttaxintaoen na nttiha ngattoxon con Dios, cainxin nimé vinttecjañantaha na nontte co joinchecoanxinho na Dios. ¹⁷ Co ndačho cain nimé: Chjaha ra gracias soixin

Dios que chonda cainxin joachaxin,
 soixin tti ttjen jai, tti joarihi desde are saho, co
 soixin tti rrocjan sihi iná,
 chjaha ra gracias ixin soixin vayehe tti anto soji
 joachaxian
 co soixin ocoexinhi coetonha.

¹⁸ Chojni de cain nación ndavinttecoñao na,
 pero ojoí nchanho que soixin sinchecastigá na,
 co cai ojoí rato que soixin sinchejuzguehe cain
 chojni que ondavenhe,
 co rrochjehe ninchehe xá que nichja na de ixin
 soixin tti tequininxin na sayé na,
 co cai tti chojni que coequininxin para ixin soixin,
 co tti chojni que nchesayehe nombrea,
 masqui jehe na yeje na o nchinchin na;
 co joí tti rato que soixin sinchetján cain chojni
 que ncheyeho co nchetján icha chojni nttihi
 ngataha nontte.

¹⁹ Cottimeja ningoe Dios que jí nttiha ngajni
 xiré, co vicon ni tti cajón que jingá tti tratoe Dios
 que jí nttiha ngaxinhi nihngo. Co anto conguíxin,
 co goan ruido, co vattehe, co coingui nontte, co
 anto vinttji ttoni.

12

Tti nchí conixin tti colantta jie de yáto já

¹ Cottimeja ngain ngajni cononxin señal anto
 jie jihi: ná nchí jisiama nčha nchanho inchin
 ná vestido jingá nčha, conixin conittjao ngangui
 rotté nčha, co ngataha já nčha jitaha ná corona
 de tteyó conotse. ² Jehe nchí jihi jiyá nčha chjan,
 co jitoyacaho nčha dolor co jidetan nčha tangui
 ixin sincheconcjihi nčha chjan. ³ Cottimeja nttiha

ngajni cononxin iná señal jihí: ná colantta jie co jatse va que jichonda va yáto já va co tte nttehe va co cada já va tetaha naná corona. ⁴ Conixin nttané va coingajinxin va ná tti ninxin parte de cain conotse que jí ngajni co cjoa va cain conotse mé para ngataha nontte. Co jehe colantta jihí tavengattjen va ngattoxon con jehe tti nchí que osincheconcjihi chjan, para rrojine va xenhe nchá nttihi rroconcjihi xan. ⁵ Co nchí mé joincheconcjihi nchá ná xanxí, co xanxí mé xan tsetonhe cain nación inchin rrocji conixin ná nttacotto de chia. Cottimeja xenhe nchá mé vačjhehe nchá xan para sacjoi xan para ngain Dios co ngain lugar tti jí nt-taxintaoen Dios. ⁶ Co jehe nchí jihí sacoinga nchá para ngagaha jna. Nttiha Dios joinchechjienhe nchá ná lugar para que nttiha rrochjé na nchá sine nchá ngoixin mil dosciento sesenta nchanho.

⁷ Después vehe ná guerra nttiha ngajni, co arcángel Miguel conixin cain ángel de jehe coetocaho na colantta jihí conixin cain ángel de jehe va. ⁸ Pero colantta conixin cain ángel de jehe va coixinha joacha ngain guerra mé, co iveha lugar nttiha ngajni para ixin jehe colantta jihí conixin cain ángel de jehe va. ⁹ Co jañá sacjoixin de nttiha jehe tti colantta que anto jie, jehe tti jí desde anto tsje nano que dinki inchínji co Satanás, tti ncheyeho chojni de ngoixin mundo. Jehe colantta mé conixin cain ángel de jehe va saxincanji para ngataha nontte.

¹⁰ Cottimeja janha coian tté ná ángel anto sén de ngajni que ndačho:

—Ojoí tiempo que Dios tsjenguijna chojni, co

Dios ocjoago joachaxin que jehe chonda co osiquetonha Dios de ján na, co ocjoago joachaxín Cristoe Dios; ixin osacjoixin inchínji de nttihi, jehe mé tti tjanguihí cain chojni que ditticaon ngain Cristo, jehe tti vacjanguihí na de ttie co nchanho ngattoxon con Dios de ján na. ¹¹ Jehe cain nimé ocjoa na cha ngain coxigo yá de ixin jní Jesucristo, tti Colecœ Dios, conixin joajné Dios que jehe na ndache na icha chojni nttihi ngataha nontte, ixin jehe na x̄aonha na de ndavenhe na, sino que jehe na vintte na dispuesto de vintteguenhe na. ¹² Mexinxin jí razón que chaha jaha ngajni, co cain jaha ra que te ra nttiha. Pero anto tangui para ixin cain tti te ngataha nontte co cain tti te ngain ndachaon, ixin inchínji oxincanji ngayaha ra. Co jehe anto jitoñao ixin nohe que tsjeha tiempo dittoehe.

¹³ Co are coxigo mé vicon va que osaxincanji va ngataha nontte, jehe va coexinhi va joinchehe va feo ngain tti nchí que joincheconcihi xanxichjan. ¹⁴ Pero jehe nchí mé vayé nčha yó nenechán coaguila yeye, para que nchao cjoaganga nčha para ngain tti lugar que vayé nčha ngagaha jna. Lugar mé cjin de ngain coxigo mé co nttiha sayé nčha tti sine nčha ngoixin ní nano co rioho. ¹⁵ Pero jehe coxigo mé cjoaxin va jinda de ngain rroha va para conchjian ná río para que rroguesiangui jehe tti nchí mé. ¹⁶ Pero nontte cjoenguijna jehe tti nchí mé ixin nontte xiré co nttiha saxincanji jehe tti río que coxigo mé cjoaxin va rroha va. ¹⁷ Mexinxin jehe va anto coñao va ngain tti nchí co sacjoi va joquietocaho va tti icha chojní nčha que x̄a xehe,

tti chojni que ditticaon cain tti ttetonha Dios co Cain tiempo nchehe na sigue de nchehe na tti ndoa que ndačho Jesucristo.

13

Tti yó coxigo ye ye co jianha

¹ Janha joaringattjen ngandehe ndachaon, co vicon cjoinxin de ngain ndachaon ná coxigo jie co jianha va que jichonda va yáto já va co tte nttehe va. Co cada nttehe va techonda naná corona co ngain cada já va techonda ná nombre que ncheofendé Dios. ² Jehe coxigo jianha que janha vicon, jí va inchin ná cotigre, co rotté va inchin rotté co-oso, co rroha va inchin rroha coleón. Co tti colantta jie joanjo va joachaxin ngain coxigo jiji para sinchehe va tsje cosa, co cai joanjo va nttaxintaoen va que tjago ixin chonda va joachaxin mé. ³ Ná de cain já jehe coxigo mé anto jie diconihi co chonda que ndarroguenhe va. Pero jehe herida mé ndacošoenhe co chojni de ngoixin mundo anto ūaon na co vitticaon na ngain jehe coxigo mé. ⁴ Co joinchesayehe na jehe colantta mé ixin joanjo va joachaxin ngain tti coxigo jianha, co cai joinchesayehe na tti coxigo jianha, co ndačho na:

—¡Xonhi chojni chonda joachaxin inchin coxigo jie jiji, co xonhi chojni tsixinhi tsetocaho va!

⁵ Cai vayé coxigo mé joachaxin de nichja va inchin chojni orgulloso co para ndačho va cosa jianha de ixin Dios. Co vayé va joachaxin de coetonha va ngoixin cuarenta y dos conittjao. ⁶ Co janhi joinchehe coxigo mé: nichja va jianha de ixin Dios, de ixin nombré Dios, de ixin ningoe que jí ngajni, co de ixin cain cosa que jí nttiha ngajni.

7 Cai coá va joachaxin de coetocaho va chojní Dios, hasta que cjoa va cha. Co cai vayé va joachaxin para ngain cain chojni de cain raza, de cain rajna, de cain nguigoa, co de cain nación. **8** Jehe coxigo jianha mé joinchesayehe cainxin chojni que te ngataha nontte; jeho tti chojni que tetaxin nombré na ngain tti libro que desde are conchjian nontte jitaxin nombré cain chojni que chonda iná vida naroaxin, jeho chojni mé nijoinchesayeha na coxigo mé. Co jehe libro jiji jichonda Cristo, tti Colecoe Dios que ndavenxin ngataha nontte.

9 Si čonja chojni ttinxin jian, tsinhi tti ndačho jiji. **10** Tti chojni que ttiaxinho icha chojni ngain cárcel, cain chojni mé chonda que sifaxinhi na cai. Co tti chojni que nadoenxon iná chojni conixin espada, cain jehe na chonda que nasenxon na conixin espada cai. Mexinxin chojní Dios chonda que rrochonda na paciencia co sitticaon na jian.

11 Después, janha vicon iná coxigo jianha que coajinxin va de ngadoho nontte. Jehe coxigo jiji jichonda va yó nttehe va inchin nttehe coleco, pero nichja va inchin colantta que chonda tsje já. **12** Co jichonda va ḫajeho joachaxin que jichonda tti coxigo jianha que cjoinxin de ngain ndachaon, co de ngattoxon con jehe coxigo jiji vanchegonda va joachaxin jiji co joinchehe va para que nontte co cain chojni que te ngataha nontte sinchesayehe tti saho coxigo jianha que cjoinxin de ngain ndachaon co coxoenhe tti herida anto jie que vechonda. **13** Cai jehe tti coxigo que cjoinxin de ngadoho nontte joinchehe va jie milagro, co hasta vechonda va joachaxin de vanchexincanji va ḫohi de ngajni para ngataha nontte ngattoxon con cain

chojni. ¹⁴ Co de ixin cain milagro jih que jehe va coá va joachaxin de vanchehe va ngattoxon con tti coxigo que saho cononxin de ngain ndachaon, joincheyehe va cain chojni que te ngataha nontte, co coetonha va ngain na que sinchechjian na ná retratoe tti coxigo coninxin já de ixin espada co masqui jamé, jehe va nchao vechon va. ¹⁵ Co tti coxigo que cononixin de ngadoho nontte vayé va joachaxin de chjé va vida jehe retratoe tti coxigo que cononxin de ngain ndachaon, para que retratoe co mé nchao nichja co coetonha va navenxon cain chojni que joinchesayeha retrato mé. ¹⁶ Co retrato jih joinchehe icha, ixin coetonhe cain chojni desde yeje na co nchinnchin na, nirico co ninoa, o chojni libre o esclavo, cainxin na afuerza rrochonda na ná marca ngain rá na lado jian o nganito nttattjen na. ¹⁷ Co xonhi chojni nchao tsehna cosa ni sinchecji cosa si chondaha na marca mé o nombré coxigo mé, o quejanhi tsjexin nombré va. ¹⁸ Cain jih rrrogondehe joarrixaon; mexinxin tti chojni que ttinxin, nchao tsonohe quejanhi tsjexin coxigo jih, ixin número mé rrochó numeroe ná xí. Co número mé seisciento sesenta y seis.

14

Quexén tsje tti ciento cuarenta y cuatro mil chojni

¹ Después janha tsjá, co vicon jehe tti Colecoe Dios tajingattjen va ngataha tti jna que dinki Sión. Co ngain jehe va te ciento cuarenta y cuatro mil chojni que tetaxin nganito nttattjen na nombré jehe va conixin Ndodé va. ² Cottimeja janha coian

ná ruido que joixin de ngajni, que ruido mé inchin tti ruido que nchechjian tsje río co inchin are dattehe ngayé jna, co mé coinnhi ni inchin are tsje chojni tedinga arpa.³ Co tetsje na ná són naroaxin nttiha ngaca lugar tti jí nttaxintaoen Dios co nttiha ngattoxon con tti canoi cosa que techon, co ngattonoxon con tti veinticuatro nittetonha que te nttiha cai. Ni ná chojni čohoa coangui són mé, sino que jeho tti ciento cuarenta y cuatro mil chojni que vayé iná vida naroaxin de ngayé cain chojni que te ngataha nontte.⁴ Cain chojni jihi tti ḫonhi nčhí ni xí joincheyehe, mexinxin vittohe joxon chojni jian co ditticaon na cainxin tti ttetonha jehe tti Colecoe Dios. Jehe na vayé na iná vida naroaxin co mexinxin vačhjeyexin na de ngayé cain chojni ngataha nontte para te na inchin ná regalo anto jian para ixin Dios co para ixin jehe Colecoe Dios.⁵ Vinchoeha ni ná mentira ngain rroha na; cain chojni mé joxon chojni jian ngattoxon con Dios.

Tti joajna que joiaho tti ní ángel

⁶ Cottimeja janha vicon iná ángel que jitjaganga ngosine ngajni co jichonda tti jian joajné Dios que ndoa para cainxin tiempo co que danjo iná vida naroaxin. Co ángel mé cjoj joindache chojni que te ngataha nontte; chojni de cainxin nación, de cain raza, de cain nguigoa, co de cain rajna.⁷ Co ángel mé jindačho sén:

—Ẋagonhe ra jeho Dios co jeho jehe tti nchecoanxini ra ixin ojoí hora que jehe sinchejuzguehe cain chojni. Nchesayehe ra tti joinchechjian ngajni, nontte, ndachaon, co cain parte tti tečhinxin jinda.

8 Cottimeja rroé iná ángel, que ndačho:

—Ondaxantte tti ciudad jie que vinci Babilonia, ixin jehe tti joinchecoan chojni de cainxin nación conixin tti vino que jehe joinchechjian, co jiji rročho ixin joinchecoenhe chojni para vechonda na icha nčhi que jeha nčičhihi na.

9 Cottimeja rroé tti ninxin ángel, que jindačho sén:

—Si čhonja chojni nchesayehe tti coxigo jianha conixin retratoe va co sitioexin na senganito marqué va nganito nttattjen na o nganito rá na, **10** chojni mé chonda que sayé tti anto soji castigo que ttixin de ngain Dios ixin Dios tsoñao. Co castigo jiji rročho ixin chojni mé rroche na ngain xohi conixin azufre ngattoxon con cain angél Dios conixin Cristo. **11** Co nchin que tsjinxin de ngain cuerpoe chojni mé tsajinhi nchin mé para cainxin tiempo, co xonhi tiempo sinchejogaha cuerpoe cain chojni mé ixin rroche na de nchanho co de ttie. Jamé tsonhe cain tti chojni que nchesayehe tti coxigo jianha conixin retratoe va, o dayé na marca de nombré va. **12** Mexinxin cain tti chojni que tequininxin para ixin Dios co ditticaon na nchehe na tti ttetonha Dios co tti ttetonha Jesús, chojni mé rrogondehe na paciencia.

13 Cottimeja janha coian tté ná ángel que joixin de ngajni co ndachjenji na:

—Janhi cjin: “De nttihi pa ndaha anto čhjoin tsonohe cain tti chojni que xá ditticaon Jesucristo are ndasenhe na.” “Ján”, ndačho Espíritu Santo, “ixin sinchejogaha na de ngain xé na, co cain tti jian que jehe na joinchehe na, mé tti tsonchiencaho na ngain Dios.”

Tti cosecha que ttjinxin de ngataha nontte

¹⁴ Cottimeja janha tsjá co vicon ná ttjoi roa, co ngataha ttjoi mé tajitaha ná tti jí inchin ná chojni. Jichjinga ná corona de oro co jiyá ná joso anto yao. ¹⁵ Co vačhjexin de ngaxinhi nihngo ngajni iná ángel, que jindačho sén ngain jehe tti jitaha ttjoi mé:

—Ñanguíhi josoa co ttjejo cosecha ixin ojoí hora co cosecha ngataha nontte joexin cha cosecha.

¹⁶ Cottimeja jehe tti jitaha ttjoi mé joinchegatto josoe ngataha nontte, co joatse tti cosecha que jí ngataha nontte.

¹⁷ Cottimeja iná ángel vačhjexin de ngaxinhi nihngo que jí ngajni; cai ángel mé jidicao ná joso anto yao. ¹⁸ Co vačhjexin de ngain altar nttiha iná ángel, que chonda joachaxin para ngain xohi, co ángel jihi vayé jehe tti ángel que jichonda tti joso anto yao co ndačho:

—Ñanguíhi josoa co ttjejo cosecha de uva que jí ngataha nontte, ixin ojoexin dichje uva.

¹⁹ Co jehe ángel mé joinchegatto josoe ngataha nontte, co joatse cosecha de uva que jí ngataha nontte. Co coenga cain uva mé ngá ná tanque jie tti nchao seninxin na ttouva, co jihi rročho tti castigo anto soji que rrrorroanha Dios. ²⁰ Cain ttouva jihi ndoja de ngain ciudad veninxin na tto, co de ngain tanque que veninxin na tto, nttiha vačhjexin jni, co jni jihi cjoinxin jni de ngataha nontte hasta tti noinxin dicaoxin conxin frenoe va, co trescientos kilómetro cjinxin vingo jni jihi.

15

Tti yáto ángel co tti yáto último cosa tangui para ixin chojni

¹ Cottimeja janha vicon ngajni iná señal jie co hasta joinchexaon na. Janha vicon yáto ángel conixin tti yáto último cosa tangui, co cosa mé tsjexinxin corajé Dios.

² Cai vicon xá ná ndachaon que nchao dicondoxin ni que jittecjan nda mé xohi. Co tti cain chojni que coixinhi cjoa cha ngain tti coxigo jianha conixin retratoe va, conixin tti quejanhi tsjexin nombré va cain chojni mé tatengattjen na ngandehe ndachaon mé conixin arpa que Dios joanjo ngain na. ³ Co tetsje na ná són inchin soen Moisés tti cjoí ninchehe xé Dios, co inchin soen Colecoe Dios; co són mé ndačho son:

Anto importante co čhjoin cainxin cosa que soixin joinchehe,
oh Dios, soixin tti chonda cain joachaxin;
nao co anto ndoa cain nttíá soixin,
co soixin tti Rey para cainxin nación.

⁴ ¿Quensen rrožagoanha soixin?
¿O quensen sinttacoanxianha soixin?
Ixin jeho soixin tti anto santo,
co tsí chojni de cainxin nación para sinttacoanxinha na,
ixin jehe na ovicon na tti jian que soixin nchehe.

⁵ Después de cain jihi, janha tsjá, co vicon tti nihngo que jí ngajni xiré, tti vechjianxin tti yó tabla que vetaxin tti tte mandamiento que coetonha Dios. ⁶ Co de ngain lugar mé vačhjexin jehe tti yáto ángel que sasicao tti yáto cosa tangui ngataha

nontte. Co ángel mé tengá lontto anto fino co hasta tetonguixima lontto mé; xonhi jinche dica lontto mé. Co tetedonga cinturón de oro ngain pechoe. ⁷ Cottimeja ná tti nó cosa que techon joanjo ngain cada tti yáto ángel mé naná vaso de oro, tecaon de tti castigo que anto soji que ttixin de ngain Dios, tti jichon para cainxin tiempo. ⁸ Co jehe lugar mé ndacaon de nchin ixin Dios anto jian co chonda cain joachaxin. Co xonhi quensen nchao joixinhi nttiha hasta joexinja tti yáto cosa tangui que joicau tti yáto ángel.

16

Tti vaso de castigo

¹ Cottimeja janha coian tté Dios anto sén que vačhjexin de ngaxinhi que jí nihngo nttiha que ndačho ngain tti yáto ángel:

—Ttji ra co ttinttjite ra tti anto soji castigoe Dios que jí ngain tti yáto vasoa ra.

² Tti saho ángel cjoí co cointtjite tti jiria vasoe ngataonhe nontte, co cainxin chojni que techonda marqué tti coxigo jianha, co nchesayehe na retratoe va, cain chojni mé vačhjema na tton anto feo co anto coín na.

³ Tti yoxin ángel cointtjite tti jiria vasoe ngataonhe ndachaon, co jinda mé cjan nda inchin jní chojni que ndadenhe, co ndavenhe cain cosa que techon ngangui jinda mé.

⁴ Tti ninxin ángel cointtjite tti jiria vasoe ngataonhe cain río co cain tti tečhinxin jinda co cain jinda mé ndacjan nda jni. ⁵ Cottimeja janha coian ndačho tti ángel de jinda:

—Soixin joinchehe inchin jiquininxin ixin joinchejuzgá jañá, oh Dios santo, soixin que rrihi jai co joarihi are saho. ⁶ Ixin chojni jianha coingo na jní tti chojnia soixin, tti cain chojni que jian nichja de ixin soixin, co jai chojni jianha soixin joincheguihi na jni, ixin jamé tequininxin na.

⁷ Co cai coian nichja ná ángel desde ngain altar co ndačho:

—Ján, oh Dios, soixin que chonda cain joachaxin, joinchejuzguehe cain chojni yá ndoa inchin tequininxin na, co nao joinchejuzguehe na.

⁸ Tti nonxin ángel cointtjitte tti jiria vasoe ngataha nchanho, co nchanho vayé joachaxin de cjoaga chojni conixin xoí nchaon. ⁹ Co cainxin chojni anto feo che na. Pero jehe na coentoxinha na de tti jianha que jehe na tenchehe na, ni joinchecoanxinha na Dios, sino que ndačho na palabra jianha para ixin Dios, tti chonda joachaxin para ngain cain cosa tangui jih.

¹⁰ Tti naonxin ángel cointtjitte tti jiria vasoe ngataha ntaxintaoen tti coxigo jianha, co tti jehe va vaquetonha va ndaconaxin xehe. Co chojni anto coín na hasta joinechje neje na de ixin tti coín na. ¹¹ Pero masqui jamé cointtoeha na de joinchehe na cosa jianha que vanchehe na, sino que ndačho na palabra jianha para ixin Dios que ttjen ngajni; nichja na jañá ixin jehe na anto coín na.

¹² Tti incjaonxin ángel cointtjitte tti jiria vasoe ngain tti río anto jie que dini Eufrates, co jinda de ngain río mé ndaxema nda co xiré ná nttiha para

ixin vatto tti rey que vinttequixin de ngain lado tti čhinxin nchanho.

¹³ Cottimeja janha vicon joíní espíritu jianha. Ná vačhjexin de ngain rroha tti colantta que chonda tsje já, co iná vačhjexin de ngain rroha tti coxigo jianha, co tti ninxin espíritu jianha mé vačhjexin de ngain rroha tti ndačho ixin nichja joajné Dios pero ndoaha. Co canio espíritu jianha mé te xá corrana. ¹⁴ Jehe canio espíritu jihi, espiritue demonio que nchehe milagro, co vagačhje para joatse cain rey de ngoixin mundo para guerra ngain nchaoen Dios, tti chonda cainxin joachaxin; co are mé jehe Dios tsjago joachaxin mé. ¹⁵ Co Cristo ndačho: “Tsjexin ra, janha sihi anto daca inchin ná xi-chehe. Anto čhjoin para ixin tti chojni que cain tiempo te listo para que tsí nchanho mé, co jamé chojni mé inchin tti chojni que ttencjhinha lonttoe co jamé xonhi tiempo čhji na ttolochlo na co xonhi chojni nchao dicon cuerpoe na.” ¹⁶ Cottimeja tti ní espíritu jianha mé joatse cain rey que ttetonha ngataha nontte para ngain lugar que dinki ixin nguigoa hebreo Armagedón.

¹⁷ Tti yatoxin ángel cointtjite tti jiria vasoe ngataonhe čhíntto. Co desde ngaxinhi nihngo que jí ngajni, co de ntaxintaoen Dios vačhjexin tté Dios co ndačho sén:

—Ojoexin cain.

¹⁸ Cottimeja conguíxin cain lado, co anto goan ruido, co anto joatte, co coingui nontte anto soji que xonhi tiempo coingui nontte jamé desde que chojni vehe ngataha nontte. ¹⁹ Co tti ciudad que anto jie vichjenga hasta ní parte, co cain ciudad de ngoixin mundo ndaxantte ciudad. Co Dios xaxaon

tti ciudad anto jie que dinki Babilonia para que vayé ciudad mé tti castigo anto soji que Dios joanjo ixin jehe coñaohe ciudad mé. ²⁰ Cain isla co cain jna ndavintteguitján. ²¹ Cai vinttixin de ngajni para ngataha nontte ttoni anto yeje que yexin hasta cuarenta kilo. Co chojni ngataha nontte nichja na jianha de ixin Dios ixin vinttji ttoni mé, ixin mé ná castigo anto soji para ixin jehe na.

17

Castigo que vayé ciudad jianha

¹ Cottimeja joí ná de tti yáto ángel que chonda tti yáto vaso, co ndachjenji na janha:

—Ñacoi, co tsjagoha tti castigo que sayé tti nchí que nchecji cuerpo ngain icha xí, rrocho tti jie ciudad jianha que tají ngandehe ndachaon. ² Cain rey que ttetonha ngataha nontte joinchehe cosa jianha ngain ciudad mé, co cain chojni que te ngataha nontte ndaviçhoe na de ixin cosa jianha que nchehe chojni ngain ciudad mé.

³ Cottimeja are janha xá vicon tti cjoagohna Espíritu Santo, ná ángel sacjoinha para ngaha jna co nttiha viconxin ná nchí que jitaha nchá ná coxigo jianha co jatse va. Co ngoixin coxigo mé jitsama va de nombre feo para ixin Dios. Co jichonda va yáto já va co tte nttehe va. ⁴ Jehe nchí jiji jingá nchá lontto morado co jatse, co ditsonji nchá de oro, conixin xo que anto fino, co perla. Co jiyá nchá ná vaso de oro jicaon de cain cosa feo co jianha que nchehe nchá. ⁵ Co nganito ntattjen nchá jitaxin ná nombre que chojni xá chonxinha co ndaçho: “Tti jie ciudad de Babilonia, tti cjoí

inchin janné cain nché que nchecji cuerpoe ngain icha xí, co de cain cosa jianha ngataha nontte.”

⁶ Cottimeja vicon jian que nché jiji ndadicoan ncha conixin jní chojní Dios, tti chojni que na goenxon na ixin cjoí na testigoe Jesús. Co are janha vicon yá, anto goan na admirado. ⁷ Cottimeja tti ángel que cjoagohna jiji, ndachjenji na:

—¿Quedonda rridoan admirado? Janha tsjagoha jaha quehe rročho tti nché yá, que mé jima jai; co sinttanoha quehe rročho tti coxigo jianha que jitaha ncha, tti coxigo que chonda yáto já co tte nttehe. ⁸ Tti coxigo jianha que jaha vicon, yá ná coxigo que vechon are saho, pero jai coxigo yá ijichonha va. Pero masqui jamé, icha saho que jehe va ndasenhe va para cainxin tiempo, jehe va tsajinxin va de ngá tsaga anto nihnga. Cain chojni que te ngataha nontte co tetaxinha nombré na ngain tti libro tti tetaxin nombré cain chojni que chonda iná vida naroaxin, cain tti chojni que tetaxinha nombré nttiha desde are conchjian nontte jiji, cain chojni jiji soan na admirado are sicon na coxigo jianha mé que vechon, co jai ijichonha va, pero que xa rrocjan va tsí va iná.

⁹ Nttihi jinichja nchion para ixin tti chojni que nchao ttinxin: Tti yáto já va, mé rročho tti yáto jna que ciudad jie yá jitaha. ¹⁰ Co cai tti yáto já va yá rročho yáto rey. Naho de tti rey yá ojoexin coetonha na, co ná de jehe rey yá jittetonha jai, co iná xa ttiha. Co are tsí tti último rey, jehe mé tsonchjenha tsje tiempo. ¹¹ Tti coxigo jianha que vechon are saho co jai ijichonha va mé tti jninxin rey, masqui cai jiji iná de tti yáto rey, co después

ndasitján para cainxin tiempo.

¹² 'Co tti tte nttehe va que jaha vicon, mé rročho tti tte rey que ḫa ttexinha ttetonha; pero cain jehe sayé joachaxin de rey para jeho nchion tiempo. Co jehe na tsetonha na junto conixin tti coxigo jianha mé. ¹³ Jehe tti tte rey jihi te de acuerdo, co sanjo na joachaxin mé ngain tti coxigo jianha. ¹⁴ Co tsetocaho na Colecce Dios, pero Coleco mé tsixinhi va sacha va ngain cain rey mé conixin ngain jehe coxigo jianha, ixin jehe Coleco tti ttetonha cainxin cosa co cain chojni, co jehe tti Rey de cainxin rey. Co cain chojni que te ngain jehe, mé Dios ndache na ixin tsí na ngain jehe, ixin jehe coinchiehe na; co cain tiempo ditticaon na jian ngain Dios.

¹⁵ Co ángel ndachjenji na cai:

—Cain ndachaon que jaha vicon tti jindehe tti nčí que rročho tti jie ciudad cain ndachaon yá rročho cain rajna, cain chojni, cain nguigoa, co cain nación. ¹⁶ Co tti tte nttehe va que jaha vicon co tti rročho tte rey, cain yá tti rroningaconhe nčí jitaha va, co tsinttohe na nčha jeho nčha co ttolocho nčha; co sine na cuerpo e nčha, co tsjaga na nčha ngain ḫohi. ¹⁷ Jamé tsonhe tti ciudad mé ixin Dios coín ngain ansén tti tte rey yá para que sinchehe inchin rinao Dios, mexinxin jehe na vintte na de acuerdo para joanjo na joachaxin de rey ngain tti coxigo jianha hasta que tsoenja tti ndačho Dios. ¹⁸ Co tti nčí que jaha vicon, mé tti ciudad importante que ttetonha cainxin rey de ngoixin mundo.

Are xantte ciudad de Babilonia

¹ Después de cain jihí, janha vicon iná ángel que jixincanjinxin de ngajni conixin tsje joachaxin, co ngoixin ngataha nontte vingasantaha de ixin chíxo que joiaho ángel mé. ² Co jitoyao soji co ndačho:

—Ovetsinga Babilonia, tti ciudad anto importante, co jai ndacjan nchiandoha demonio, co cuevé cainxin clase de espíritu jianha, co caqué cain conttoa ttjoaha co feo. ³ Ixin chojni de cainxin nación ndavičhoe na de ixin tti jianha que nchehe chojni de ngain ciudad mé, co cain cosa jianha mé inchin ná vino que nchecoan chojni mé, co cainxin rey de ngoixin mundo joinchehe na joxon cosa jianha ngain ciudad jihí, co xicomerciante de ngoixin mundo ndacjan xa rico de ixin cain cosa rentte que vaquehna ngain ciudad mé co vanchecji ngain icha chojni.

⁴ Cottimeja coian tté Dios que joixin de ngajni co ndačho:

—Dačhjexin ra de ngain ciudad yá, jaha ra xo chojnina janha, para que sincheha ra tti jianha que nchehe icha chojni de ngain ciudad yá, ni rrotseha ra castigoe na. ⁵ Ixin tti jianha que jehe na tenchehe na, anto ndacotsje co vixintja chó co joiji hasta tti ngajni, co Dios xaxaon co nichja de ixin cain tti jianha mé que jehe na tenchehe na. ⁶ Danjo ra ngain ciudad yá inchin jehe joanjo ngain icha chojni, co ttjenguehe ra ciudad yá hna doble de tti jehe joinchehe nganji ra. Co ttinttecjan ra ná tti sihi yó ntiha icha soji que tti jehe ciudad yá cointtecjan para icha chojni. ⁷ Inchin čhjoinxin que conohe ciudad yá co čhjoin que

vehe, jamé tsjexin dolencia co tangui ncheguetan ra ciudad yá, ixin ndačho ngain ansén: “Nttihí tarrihi janha inchin ná reina; janha jeha ganha na, ni xonhi tiempo setan tangui.” ⁸ Mexinxin ngain nacoa nchanho, tsí cain castigoe ciudad yá: jehe ndasenhe, co tsa joachjaon, senhe jintta co rroche conixin xohi, ixin Dios tti jichonda cain joachaxin jañá joinchecondená ciudad yá.

⁹ Cain rey de ngoixin mundo ttijoinchehe jianha ngain ciudad yá co ché, cain rey mé rrrotsjanga co tsa joachjaon de ixin ciudad yá are jehe sicon tsajinhi nchin are rroche ciudad yá. ¹⁰ Cjin sintte cain rey mé ixin rrožagoen castigo que sayé ciudad yá co rrondačho:

—¡Ay! ¡Anto tangui para ixin jaha, ciudad que anto jie Babilonia, ciudad que chonda anto joachaxin! Ixin ngain nacoa rato joí cain castigoa.

¹¹ Cai cain xicomerciante de ngoixin mundo rrrotsjanga xa co tsa xa joachjaon de ixin tti tsonhe jehe ciudad yá, ixin iseha quensen tsené xa carga que tsiaho xa. ¹² Inchin carga de oro, de plata de xo anto fino, de perla, de manta fino que dinihi lino, de seda de color morado co jatse; cai de cain clase de nttá que čhjoin xajni, de cain cosa que diconchjian joxon marfil, de nttá que anto rentte, de bronce, de hierro, co de marmol, ¹³ co carga de canela co icha ca que čhjoin xajni, tsjoca, mirra, perfume, vino, aceite, harina fina, trigo, co cai coxigo que tama, coleco, conxin, carro, co hasta chojni vanchecji xa para vaguittohe na de esclavo. ¹⁴ Cain xicomerciante mé rrondačho xa ngain ciudad jihi:

—¡Ichondaha cain cosa čhjoin que anto vant-taxoxinha, co ndajoinchetján para cainxin tiempo cain cosa rentte co cain cosa que anto jian que joarichonda!

¹⁵ Cain tti chojni que vanchexin negocio de ixin cain cosa yá co ndacorrico na de ixin ciudad yá sinttengattjen na cjin de jehe ciudad, ixin rrožagoen na tti castigo que sayé ciudad yá co rrotsjanga na co tsa na joachjaon, ¹⁶ co rrondačho na:

—¡Ay! ¡Anto tangui para ixin ciudad que anto jie vehe! Ciudad yá vehe inchin ná nčhí que vengá lontto fino conixin lontto de color morado co jatse, co vetsonji nčha de oro, co de xo que anto fino conixin perla. ¹⁷ ¡Co ngain nacoa rato ndajoexin tti anto tsje cosa rentte que vechonda ciudad yá!

Cainxin xicapitán de ngain barco conixin cain chojni pasajero conixin cain ximarinero, co cain chojni que nchehe xa ngain ndachaon, tavinttengattjen na cjin, ¹⁸ co are vicon na nchin que jittjinxin de ngain xohi que jichexin ciudad yá, jehe na coyao na co ndačho na:

—¿Quexehe iná ciudad vehe icha importante inchin ciudad jihí?

¹⁹ Co de ixin joachjaon que coá na cointtjitte na jinche já na, co tsjanga na, coá na joachjaon, coyao na, co ndačho na:

—¡Ay! ¡Anto tangui para ixin tti ciudad que anto jie vehe! ¡Conixin cain cosa rentte que vechonda ciudad yá corricoxin cain xí que chonda xa barco ngain ndachaon! ¡Co ngain nacoa rato ndaxantte ciudad yá!

20 Pero cain jaha ra xo te ra ngajni, co jaha ra xo cjoí ra representanté Jesucristo, co jaha ra xo nichja ra joajna que dayehe ra de ngain Dios, co cain ra xo chojní Dios, cain jaha ra mé chaha ra ixin ciudad yá goan condenado co Dios joinchehe jie para ixin jaha ra.

21 Cottimeja ná ángel que chonda tsje joachaxin tsín ná xo, co xo mé jí xo inchin ná xočhin jie co joancahngui xo ngangui ndachaon, co ndačho:

—Cai janhi setsiangui Babilonia, tti ciudad anto jie, co ixonhi tiempo rrocjan ra sicon ra ciudad iná. **22** Ixonhi tiempo rrocjan tsinhi ni ngá ntié ciudad mé soen arpa, flauta, co trompeta. Ni iseha ngain ciudad mé ni ná chojni que chonxin ni ná tipo de xa, ni itsinha ni tti ruido que nczechjian xočtja ngataha xočhin. **23** Ni isingasanha ngain ciudad yá ni ná xoí lámpara co ixonhi tiempo tsinhi ni tti ruido de tti quié chojni que tottehe. Jamé tsonhe masqui xicomerciante que vintte ngain ntiha are saho vechonda anto tsje joachaxin, co masqui ciudad yá joincheyehe chojni de ngoixin mundo conixin joattosohe.

24 De ngain ciudad yá vinchoexin jní chojni que nichja de ixin Dios, co jní chojní Dios, co jní cain chojni que vinttegoen na ngoixin ngain mundo jihí de ixin causexin Dios.

19

1 Después de cain jihí, janha coian tté tsje chojni que joixin de ngajni que ndačho soji:

¡Nttocoanxinho na Dios! Dios de jána tti danjo iná vida naroaxin, co jehe chonda cain gloria co cain joachaxin,

² ixin jehe nchejuzgá inchin jiquininxin, co ndoa
tti jehe nchejuzgá;
ixin jehe joinchecondená tti ciudad jie co jianha,
tti joincheconcaña ngoixin mundo de ixin tti
jianha que jehe joinchehe;
Dios joinchecastigá ciudad mé ixin jehe vantsjehe
vidé ninchehe xé jehe.

³ Cottimeja cjan cain chojni mé ndačho na iná:
—¡Nttocoanxinho na Dios! Ixin tti nchin de ciudad
mé xonhi tiempo tasehe de tsjinji nchin mé.

⁴ Co tti veinticuatro nittetonha co tti nó cosa que
techon vinttecjañantaha nontte co joinchecoanx-
inho Dios que retaha ntaxintaoen, co vintten-
dačho na:

—¡Amén! ¡Nttocoanxinho na Dios!

⁵ Cottimeja coinihi ni ná tté ángel que joixin de
ngaca ntaxintaoen Dios que ndačho:
Nchecoanxinho ra Dios de ján na
cain jaha ra xo nchehe ra xé
co xagonhe ra jehe
masqui nchinnchin ra o ye ye ra.

Tti quiai are Jesucristo tsottehe

⁶ Co cai coian ná cosa que inchin tté tsje chojni
co inchin are dañoin jinda de tsje río, co inchin are
soji joattehe, co cain tté chojni mé ndačho:

¡Nttocoanxinho na Dios! Ixin ocoexinho coetonha
Dios de ján na tti chonda cainxin joachaxin.

⁷ Cainxin na rrochá na, anto rrochá na co sont-
tosayehe na Dios mé,
ixin ojoí tti nchanho que tsottehe Jesucristo, tti
Colecue Dios.

Co čhihi Jesucristo ojí nčha listo,

8 co jehe nčhinovia mé vayé nčha joachaxin de vengá nčha tti lontto de ná manta anto fino que dinki lino; co xonhi mancha chonda lontto mé, co hasta jitonguixima lontto.

Ixin jehe tti lino fino mé rročho tti vida nao que chonda cain chojní Dios.

9 Cottimeja jehe ángel mé ndachjenji na janha:

—Jaha ttentaxin janhi: “Anto čhjoin para ixin cain tti chojni que Dios nichjé ixin tsji ngain quiai tti tsottehe Jesucristo, tti Colecoe Dios.”

Co ndachjenji na ángel mé:

—Cain jiji palabra ndoa que ndačho Dios.

10 Janha joarit toxin nttajochjihna ngaca rotté ángel para rrojinttsayá, pero jehe ndachjenji na:

—Ncheha yá, ixin janha jeho ná ninchehe xé Dios, jañá inchin jaha conixin cain chojni que ditticaon cain tiempo tti ndoa que cjoago Jesús. Mexinxin jaha nchesayehe jeho Dios.

Ixin jehe tti joajna ndoa yá que cjoago Jesús, mé tti nchenichja cain chojní Dios joajné jehe.

Tti jitaha conixin coroa

11 Cottimeja vicon ngajni jižangué co cononxin ná conxin roa, co tti jitaha va dinki: jehe tti nchehe xé Dios conixin ansén, co tti ndoa. Ixin jehe ttetonha co tteto ngain guerra pero nao inchin jiquinixin. **12** Jmacon chojni mé conguíxin inchin neje xohi, co ngataha já jidicaoxin tsje corona, co jitaxin ná nombre nganito que jeho jehe chonxin nombre mé. **13** Chojni mé jingá ná lontto que diguingaxin jni, co nombré chojni mé, mé tti Palabré Dios. **14** Co terroé xisoldado de ngajni, tengá xa lontto de lino anto fino, co roa lontto mé co xonhi

jinche yá lontto, co tetaha xa joxon conxin coroa. ¹⁵ Co jehe tti dinki Palabré Dios, mé de ngain rroha jidačhjexin ná espada anto yao, para sinchen-inxin chojni de cainxin nación; co tsetonhe cain nación jihí inchin conixin ná ntacotto de chia. Co jehe sinchejuzguehe cain nación jihí inchin tti deninxin ttouva conixin rotté, co jehe mé sincheguihi cain nación tti vino que sačhjenguixin ttouva, pero mé rročho que jehe tti sinchegayé na tti castigo anto soji que ttixin de ngain Dios tti anto doňaohe na co tti chonda cainxin joachaxin. ¹⁶ Co nganito tti manta que jitsá chojni mé, co nganito rotté tetaxin nombre jihí: “Rey de cainxin rey, co tti Ttetonha de cain tti ttetonha.”

¹⁷ Cottimeja janha vicon ná ángel que tajingat-tjen ngataha nchanho, co coyaotte anto soji ngain cain conttoa que tjaganga para noi, co ndačho:

—Ñacoí ra co xatte ra para ngain tti cena de Dios, ¹⁸ para sintte ra nttaohe cain rey, co nttaohe cain xigeneral, co nttaohe cain xí čhíntto, co nttaohe conxin, conixin nttaohe xitetaha va, co nttaohe cain chojni masqui chojni que te libre o esclavo, co de chojni nchinchnin co yeye.

¹⁹ Cottimeja janha vicon tti coxigo jianha conixin cain rey que ttetonha ngataha nontte, conixin cain xisoldadoe rey mé. Cain na xatte na para tsetocaho na jehe tti jitaha conxin coroa conixin cain xisoldadoe. ²⁰ Jehe tti coxigo jianha mé viaxinho va ngain cárcel, conixin tti vandačho ixin jehe ná tti nichja joajna que vagayé de ngain Dios, pero jeha ndoa. Co jehe mé tti joinchehe tsje milagro ngattoxon con coxigo mé. De ixin jehe cain milagro mé, jehe tti jeha ndoa tti nichja

mé, joincheyehe cain tti chojni que vittoexin coá marqué coxigo jianha co joinchecoanxinha na retratoe va. Cottimeja jehe coxigo jianha mé conixin jehe tti jeha ndoa tti nichja, jamé techon savinttetsingangui tti xohi que jichexin conixin azufre. ²¹ Co tti icha chojni venxin na conixin tti espada que vačhjexin de ngain rroha jehe tti jitaha conxin coroa, co cainxin conttoa hasta cojexin va nttaohe cain chojni mé.

20

Tti mil nano

¹ Después janha vicon ná ángel que jixincanjinxin de ngajni conixin llavé tti tsaga anto nihnga co jiyá ná cadena anto jie. ² Jehe ángel jihi tse jehe tti conché mé, tti conché que ovehe desde sé co jehe mé tti inchínji co dinki Satanás. Co ángel coiaxin va conixin cadena mé para mil nano. ³ Co joancá va ngain tti tsaga anto nihnga, co ntiha coiaxinha va. Co cointtohe ná sello ngain puerté tsaga mé para que isinchejeyeha va chojni de cainxin nación hasta que sattoja mil nano. Co después de tti mil nano mé, chonda que rroxindanguehe va nchion tiempo.

⁴ Cottimeja vicon tti tsje nttaxintaon importante, co ntiha tatetaha chojni que vayé joachaxin para sinchejuzgá. Cai janha vicon almé cain tti chojni que činji já ixin ndache na chojni tti joajné Dios que cjoago Jesús. Cain chojni mé joinchecoanxinha na tti coxigo jianha ni retratoe va ni vittoexinha na coá na marqué va nganito nttattjen na o nganito rá na. Janha

vicon xechon cain chojni jihi co jehe na conixin Jesucristo coetonha na para mil nano. ⁵ Chojni mé tti saho chojni que rroxechon. Pero tti ni icha que vintteguenhe ixechonha na hasta después de tti mil nano mé. ⁶ ¡Anto čhjoin co jian tequininxin para ngain Dios cain tti chojni que rroxechon ngain jehe tti saho tiempo que rroxechon chojni! Tti yoxin nttiha que ndadenhe ni ichondaha ni ná joachaxin ngain na, sino que jehe na sintte na dána para ngain Dios co ngain Jesucristo, co jehe na conixin Jesucristo tsetonha na para mil nano.

⁷ Co are satto jehe tti mil nano mé, Satanás rroxindanguehe co sačhjexin de ngain tti siasinhi, ⁸ co sačhje para sincheyehe Gog co Magog, rročho sincheyehe chojni de cainxin nación de ngoixin mundo, co satse cain xisoldadoe de ngain chojni que jehe sincheyehe para ngain guerra, co cain xisoldado jihi anto tsje xa inchin nchise ngain ndachaon. ⁹ Co coani xa hasta tti jicaxin nontte, co vixindanji xa tti sín chojní Dios co tti ciudad que Dios anto rinao. Pero Dios rroanha xohi de ngajni, que cjoaga cainxin xa. ¹⁰ Co Dios rroanha inchínji, tti joincheyehe cain xisoldado mé, para ngatte ndachaoen xohi que jichexin azufre, tti orroanha coxigo jianha conixin tti jeha ndoa ixin vayé joajné Dios. Nttiha rroche na de nchanho co ttie para cainxin tiempo.

Tti chojni que goenhe juzgado ngain tti ntaxintaon roa

¹¹ Cottimeja janha vicon ná ntaxintaon anto jie co roa, co cai vicon tti jitaha nttiha. Ngattoxon con mé, ndavitján nontte co ngajni, co ixonhi lugar

vehe para rroguehe cayoi cosa jihi. ¹² Co janha vicon cain chojni que ndavenhe, tti yeye co tti nchinnchin, tatengattjen na ngattoxon con Dios. Co xiré cainxin libro, conixin iná libro cai, que mé tti libro que jitaxin nombré cain tti chojni que chonda iná vida naroaxin. Cain chojni que ndadiguenhe, mé goenhe na juzgado inchin jehe na joinchehe na are vinttechon na, inchin tetaxin ngain cain libro mé. ¹³ Ndachaon joanjo nda cain chojni que ndavenxin ngain nda co tti ndadenhe ni, co tti lugar que ttji cain chojni que ndadenhe, cayoi mé joanjo cain chojni que ndavenhe co te nttiha. Co cain chojni mé goenhe na juzgado; cada na inchin jehe na joinchehe na are vinttechon na. ¹⁴ Cottimeja tti ndadenhe ni, co tti lugar que ttji cain chojni que ndadenhe, cayoi mé savinttjiatte ndachaoen xohi. Jehe xohi jihi rročho tti yoxin tiempo que ndadenhe ni, ¹⁵ co nttiha vinttjiatte cain tti chojni que tetaxinha nombré ngain tti libro que tetaxin nombré cain tti chojni que chonda iná vida naroaxin.

21

Ngajni naroaxin co nontte naroaxin

¹ Después janha vicon ná ngajni naroaxin co iná nontte naroaxin, ixin tti saho ngajni co tti saho nontte ndavitján, co iveha ndachaon. ² Co janha Juan, vicon tti ciudad santa, tti Jerusalén naroaxin, que jixincanjinxin de ngajni, tti ttjen Dios. Ngoixin ciudad mé anto čhjoin jí inchin ná xannovia čhjoin diguitoxinhi para tsottehe xan ngain xixihi xan. ³ Co coian ná tté ángel que joixin de ngajni co ndačho sén:

—Tsjexin, Dios jí jai ngayé chojni. Jehe sehe ngayé na, co jehe na sintte na chojní jehe, co jehe Dios mismo sehe ngain na para sehe Dios de jehe na. ⁴ Dios sinchexema cain ndacon na, co isenha na, ni irrotsjangaha na, ni iseha joachjaon, ni ixonhi tti tsín na, ixin cain tti vehe are saho, mé ovatto.

⁵ Cottimeja jehe tti jitaha nttaxintaon icha importante ndačho:

—Tsjexin, janha nttachjian cain cosa naroaxin.

Cai ndačho:

—Jaha ttentaxin cain jiji, ixin cain palabra jiji ndoa co nchao rrochonda ra confianza ngain palabra jiji.

⁶ Después ndachjenji na:

—Onchao jí cain. Janha tti icha saho varichon de cainxin cosa, co janha tti sarihi are cainxin cosa ndatsjexin, jañá inchin tti letra A saho de cain letra co inchin Z tti último de cain letra. Tti chojni que denhe jinda janha rrochjaha chojni mé jinda para sihi, co jinda mé danjo nda iná vida naroaxin, co xonhi nttacobrá chojni mé. ⁷ Tti chojni que tsixinhi de sincheha cosa jianha sayé cain jiji inchin herencia, co janha sarihi Dios de chojni mé co jehe sehe xanhna. ⁸ Pero cain tti chojni que xon para ndačho ixin janha amigoe na, co tti chojni que ditticaonha nganji na janha, co tti chojni jianha, co tti chojni que dantsjehe vidé icha chojni, co tti chojni que chonda nchicoxe o xicoxe, co tti chojni que dantonga icha chojni, co tti chojni que nchesayehe ídolo, co cain chojni mentiroso; cain chojni mé chonda na que tsji na

ngain tti jiche ḫohi conixin azufre, co mé rročho tti yoxin nttiha que ndasenhe na.

Tti Jerusalén naroaxin

⁹ Cottimeja joí ná de tti yáto ángel que teyá tti yáto vaso que tecaoñ tti último yáto castigo. Co ángel mé ndachjenji na:

—Ẋacoi, co tsjagoha xannovié Colecoé Dios.

¹⁰ Cottimeja are janha ḫa vicon tti cjoagohna Espíritu Santo, jehe ángel mé sacjoinha ngataha ná jna anto jie co noi jna mé, co de nttiha cjoagonanxin Jerusalén, tti ciudad santa que jixincanjinxin de ngajni, tti ttjen Dios. ¹¹ Jehe ciudad mé jitonguixima de ixin chíxó que chonda Dios, co tti jehe jitonguíxim mé inchin ná ḫo que anto fino, inchin ná ḫo que dinihi jaspe, que ḫo mé nchao diccondoxin ni ḫo inchin ḫočao. ¹² Ngandanji ciudad mé jindanji ná ttjarioho jie co noi co jichonda tteyó puerta co naná ángel jinda ngain cada puerta mé. Co nganito naná puerta mé tetaxin nombré tti ná tteyó grupoe chojni Israel. ¹³ Jí ní puerta lado tti čhinxin nchanho, co ní puerta lado norte, co ní puerta lado sur, co ní puerta lado tti diataonxin nchanho. ¹⁴ Co jehe tti ttjarioho jie que jindanji ciudad mé jichonda ttjarioho tteyó ḫo inchin de base, co nganito naná ḫo mé tetaxin nombré tti ná tteyó representanté jehe tti Colecoé Dios.

¹⁵ Tti ángel que jinichja nganji janha jiyá ná ntacotto de oro para joattechoxin ciudad mé conixin ttjarioe co cain puerta que jichonda ttjario. ¹⁶ Ciudad mé cuadrada; rročho ixin tti jinixin ciudad ḫajeho inchin tonxin ciudad. Jehe ángel mé joattechoha ciudad conixin ntacottohe,

co jininxin ciudad dos mil dosciento kilometro, co inchin jininxin cai noinxin, co cai tonxin ciudad xajeho cai. ¹⁷ Cottimeja joattechoha ángel mé tti ttjarioho que jindanji ciudad, co ttjarioho mé jichonda sesenta y cuatro metros de noinxin. Angel mé joinchegonda medida que dattechoaxin chojni nttihi ngataha nontte.

¹⁸ Jehe ttjarioho que jindanji ciudad mé diconchjian joxon xo fino que dinhi jaspe. Co ciudad diconchjian joxon oro, co jitsjehe inchin xo xao que xonhi jinche yá. ¹⁹ Co tti tteyó xo que te de base ngain tti ttjarioho que jindanji ciudad, cain xo mé ditsonji xo de cainxin clase de xo fino: tti xo saho ditsonji de jaspe, xo yoxin conixin zafiro, xo ninxin conixin ágata, xo nonxin conixin esmeralda. ²⁰ xo naonxin conixin ónica, co xo incjaonxin conixin cornalina, co xo yatoxin conixin crisólito, co xo jninxin conixin berilo, co xo nanxin conixin topacio, co xo ttexin conixin crisoprasa, co xo ttejngoxin conixin jacinto, co xo tteyoxin conixin amatista. ²¹ Tti tteyó puerta, mé tteyó perla, co cada puerta diconchjian de nacoa perla. Co tti nttiha icha importante de ciudad mé jia joxon oro, co inchin xo xao que nchao dicondoxin ni.

²² Nttiha ngain ciudad mé janha viconha ni ná nihngo, ixin Dios, tti chonda cain joachaxin, mé tti nihngo para ixin ciudad mé conixin jehe tti Colecoe. ²³ Ciudad mé rrogondeha nchanho ni conitjao para sinchengasenhe, ixin mero chíxo que Dios chonda nchengasán ngain ciudad mé, co jehe Colecoe, mé tti xohi para ixin ciudad mé. ²⁴ Chojni de cain nación que chonda iná vida naroaxin,

cain chojni mé ngoixin tti čhji na chonda na joadingasán que danjo ciudad mé. Co cain rey de ngoixin mundo tsiaho ngain ciudad mé cain cosa importante que jehe chonda co sinchesayehe ciudad mé. ²⁵ Cain puerta que jichonda ttjarioe ciudad mé sijeha are nchanho, co nttiha ḵonhi ttie sehe. ²⁶ Co nttiha sicao na cain cosa importante de cainxin nación, co cain tti tosayexin cain nación jiji. ²⁷ Pero ḵonhi tiempo sixinhi nttiha cosa ttjoaha, ni ná chojni que ncuhehe cosa jianha o que ncheyeha icha chojni čhoa sixinhi nttiha. Sino que jeho tti chojni que tetaxin nombré ngain tti libro que tetaxin nombré cain chojni que chonda iná vida naroaxin, co Colecoe Dios jichonda libro mé. Jeho chojni mé tti sixinhi ciudad mé.

22

¹ Cottimeja jehe ángel mé cjoagohna ná río de jinda que ḵonhi jinche chonda, co jinda mé tti danjo iná vida naroaxin. Jinda mé anto dicondoxin ni nda inchin ná ḵožao, co jidačhjexin jinda mé de ngain nttaxintaoen Dios conixin de ngain Colecoe. ² Ngosine tti nttiha icha importante de ciudad mé co cayoixin ngandehe río mé te tti nttá que danjo vida. Co nttá mé danjo nttatnochjoin tteyó nttiha ngá nano ixin danjo nttatnochjoin cada conittjao. Co qué nttatnochjoin mé jian ca para xingamenxin chojni de cainxin nación. ³ Nttiha seha chojni ni ḵonhi cosa que Dios joinchecondená. Nttiha sehe nttaxintaoen Dios conixin jehe Colecoe ngain ciudad mé, co ninchehe ḵé Dios co Jesucristo sinchecoanxini na jehe. ⁴ Jehe na sicon na ngá con Jesucristo

co jehe sicon ngá con na jehe na, co nganito ntattjen na setaxin nombré jehe. ⁵ Nttiha ixonhi naxin xehe sehe, co cain chojni que sintte nttiha isondeha na xohi de lámpara, ni de nchanho, ixin Dios tti chonda cain joachaxin, jehe tti sinchen-gasañehe na, co jehe na nitsetonha para cainxin tiempo.

Ochian joí tiempo que Jesucristo tsí iná

⁶ Cottimeja ángel mé ndachjenji na janha:

—Cain palabra jihi ndoa co nchao sehe confianza ngain palabra jihi. Co jehe tti chonda cain joachaxin, que mé Dios mismo que nchenohe cain chojni que nichja joajné, jehe Dios rroanha ángel de jehe para joicjagoe cain ninchehe xé tti siconhe toin.

⁷ Co Jesucristo ndačho:

—Janha sihi toin!

¡Anto čhjoin para ixin cain tti chojni que ncuhe caso joajné Dios que jitaxin ngain libro jihi!

⁸ Janha Juan coian co vicon cain cosa jihi. Co después de coian co vicon, joarit toxin nttajochjhina ngaca rotté ángel tti cjoagohna cain jihi para rrojinttasayá. ⁹ Pero jehe ndachjenji na:

—Ncheha yá, ixin janha jeho ná ninchehe xé Dios, jañá inchin jaha conixin cain chojni que nichja de ixin Dios conixin cain chojni que ncuhe caso tti jitaxin ngain libro jihi. Jaha nchesayehe Dios.

¹⁰ Cai ndachjenji na ángel mé:

—Jaha, ttemaha joajné Dios que jitaxin ngain libro jihi, ixin ochian joí tiempo que siconhe cain tti jitaxin nttihi. ¹¹ Mexinxin tančhjanda que tti

chojni jianha sinchehe na sigue nchehe na tti jianha, co tti chojni ttjoaha sinchehe sigue ngain tti ttjoaha; pero tti chojni jian sinchehe na sigue de nchehe na tti jian, co tti chojni que coequininxin para ixin Dios sinchehe na sigue de ditticaon na jian cainxin tiempo ngain Dios.

¹² Co Jesucristo ndačho:

—Ján, janha sihi toin. Co siquian premio que rrochjaha cada chojni, inchin jehe na joinchehe na. ¹³ Janha tti icha saho varichon de cainxin cosa co janha tti sarihi are cainxin cosa ndatsjexin, jaňá inchin tti letra A saho de cain letra co inchin Z tti último de cain letra.

¹⁴ Anto čhjoin para ixin tti chojni que ttjén lonttoe para rrochonda na joachaxin de sine na ttochjoin de ngain tti nttá que danjo vida, co jamé nchao sixixin na ngain cain puerté ciudad mé.

¹⁵ Pero tti chojni jianha sitiohe na ndoja conixin tti chojni que dantonga icha chojni, co tti chojni que chonda nčhicoxehe o xicoxehe, co tti chojni que dantsjehe vidé icha chojni, co tti chojni que nchesayehe ídolo, conixin cain tti chojni que anto rinao ncheyeho icha chojni.

¹⁶ Co Jesucristo ndačho:

—Janha Jesús orroanha ángel de janha para joinchenohe cain jihi chojni de cain nihngo. Janha tti joixin de ngain razé rey David, co janha tti conotse que anto soji nchengasán are nttoyo.

¹⁷ Espíritu Santo co čhihi Coleco ndačho:

—Ẋacoi.

Co cain tti ttinhi jihi ndačho:

—Ẋacoi.

Cain ra xo senhe ra jinda co xo sinao ra sihi ra, xacoi ra co sihi ra jinda que danjo iná vida naroaxin, co xonhi tomi tsjenga ra hna.

¹⁸ Janha Juan rrindačjan janhi ngain cainxin chojni que ttinhi co ncuhehe caso joajné Dios que jitaxin ngain libro jihi: Si čhonja chojni sinchecoенhe na chojni icha cosa de ixin tiempo que tsí que jeho cosa que jitaxin nttihi, Dios rrochjé na icha tsje castigo de tti cain castigo que jitaxin ngain xón jihi. ¹⁹ Co si čhonja chojni santsjehe na masqui nchion de ngain joajné Dios que jitaxin ngain xón jihi, Dios santsjehe na tti parte que jehe na chonda na ngain tti libro tti tetaxin nombré cain chojni que chonda na iná vida naroaxin, co santsjehe na tti parte que jehe na chonda na ngain tti ciudad santa. Co xón jihi nichja de ixin libro mé co ciudad mé.

²⁰ Tti ndačho cain cosa jihi, jehe ndačho:

—Ján, janha sihi toin.

Amén. ¡Xacoi, soixin Jesús!

²¹ Que Jesucristo, tti chonda cainxin joachaxin para ixin ján na, sinttanchaon cainxin ra. Amén.

**Tti jian joajn   Jesucristo
New Testament in Popoloca, San Marcos Tlalcoyac  **

copyright © 1982 Wycliffe Bible Translators, Inc.

Language: San Marcos Tlalcoyac   Popoloca (Popoloca, San Marcos Tlalcoyac  )

Translation by: Wycliffe Bible Translators, Inc.

Popoloca, Tlacoayac   [pls], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Marcos Tlalcoyac  

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 11 Nov 2022 from source files
dated 29 Jan 2022

a23ba35e-b016-5f67-a705-694e460cf18a